


解學士集

五



庫	文	閣	內
四	三	三	漢
五	六	六	書
函	二	二	類
架	冊	冊	
	號	號	

庫	文	閣	內
三	三	三	漢
六	六	六	書
函	一	一	類
架	冊	冊	
	號	號	

內閣文庫	
番號	漢 3629
冊數	10(5)
函號	316 102



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



Kodak, 2007 TM: Kodak



解學士文集五卷目錄

解

解學士文集五卷目錄

族譜

吉水

解氏

解氏題辭

宋氏重脩

夏璜劉氏

螺陂蕭氏

城西蕭氏

虎溪蕭氏

嶺口龍氏

吉水姜氏

吉水東門徐氏

吉水桑園周氏

重脩解氏

吉水水泥田周氏

吉水白沙王氏

歐陽文忠公家

吉水倚傅蕭氏

吉水金壁孫氏

鏡方彭氏

吉水橋頭彭氏

山陂龐氏重脩

吉水

解學士文集五卷目錄

吉水東門徐氏

五氏

東門胡氏

吉水劉氏

藍氏

龍城毛氏

吉水江氏

吉水寨里安成李氏

東門鄒氏

吉水許氏

吉水山原羅氏

夏派劉氏

東門李氏

吉水余氏

吉水龐氏

堤平張氏

烏江陳氏

泰和王氏

泰和楊氏

泰和歐陽氏

廬陵城西劉氏

廬陵官草彭氏

廬陵朱氏

永豐湖西羅氏

永豐水東羅氏

永新逢橋左氏

永新厚田周氏

寶應金氏

五鎮倪氏

南昌劉氏

盱江胡氏

新淦吳氏

新淦丁氏

永新田南劉氏

吉水花園王氏

解學士文集卷之五

序

吉水解氏族譜序


解氏姬姓唐叔虞之子食采於解子孫以邑爲氏今山西平陽府解州也予嘗道經弘農入函谷關濱河而行百數十里太行中條在河東隔岸依依然如與人無行也問其土人云渡河去解州纔一日程然以事拘繫不得一造其地未嘗不爲之躊躇歎息而俛仰於百年之先也及過洛陽過豐鎬觀文武周公之遺過武功有郃城后稷之始封皆爲之裊裊顧望至幽拜姜嫄后稷墓下讀其廟碑俯臨涇水想見當時悲歌吊古悠然有感於中而所思益以遠而益知親親一念之誠亘古今而不可泯豈可於其近而

親切者而反忽之哉故予於家譜自生七年以來即知誦習爲之考證至于今三十餘年未嘗一日廢以怠也舊譜相傳自秦漢之際徙家鴈門今山西大同府也至天寶中有諱隱字退翁與子禹字德遠並舉進士及第退翁仕爲蘄州司戶叅軍德遠爲湖州安吉縣令值安史之亂父子皆寓於蘄由蘄遷金陵德遠用薦爲吉州刺史因家廬陵同水鄉臻善里今吉水縣西鷓鴣洞迹符南山之麓世傳許遜治蛟孽迹其所篆符於此地故得名俗訛呼爲積富而吉水縣則南唐後主保大八年析廬陵所置或云隋大業中嘗置而旋廢史傳不載不知其果然否也黃巢之亂吉之世族相與率鄉兵拒却之由是吉獨不罹其害或云吉州有山名天獄巢亦聞而惡之遂歛兵去蓋傳聞耳今

吉水縣治有招義寨實刺史公之曾孫諱感字世隱者所築以禦巢而子孫因家焉世隆在南唐追贈僕射子孫皆仕爲制置至宋仁宗嘉祐己亥僕射子之孫諱希孟字伯軻天聖進士茂州司戶叅軍知廉州致仕子安字吉甫熙寧進士濮州叅軍秘書丞致仕父子始即縣東之鑑湖書院居焉先是其傍有道院梁上二鍾自相擊以索擊之一夕地陷名曰陷湖其曰鑑湖者因制置公之請而南唐烈祖所賜名也書院本僕射公之所作環壘而可見者有五皆爲湖其前而傍皆有第宅周垣其南曰平湖北曰菱湖皆淤爲平疇西曰青湖爲江水所決獨鑑湖與東湖夾兩山之脊而瀦其水雖有淤泥不至泯沒尤多芙蓉遶岸林木蔚然解氏之居在鑑湖上者盤矗如舊而弦誦之聲不

絕宋丞相劉冲之少時游學其所題句猶在也 緡上距漢州公纔十世家譜之傳中更大亂收拾幸存世有纂續而其世年表媼家別錄先龍啣志宗支啣記姓原記畫像記顯揚記委曲詳盡比於他譜似為尤勝又出於歐蘇之譜之先而世未能盡見也嗟乎自中唐以來七百餘年纔三徙其居而不出於州里之間考其山川已有變易而一卷之譜猶存其舊子孫不失其業非連世之有積於已而有得於天安能不與山川俱變易而與時世俱轉移也哉惟譜之所載已久雖山川不能無異者此考證之所為作也譜有顯敷自唐至今每舉必父子兄弟聯芳彙武而起以為常其諱元者累功封太原王諱誠者連三世國公亦可謂盛矣然比於他姓功名富貴過此者尤甚多也求其能

與此譜同久遠而無所闕遺者則誠所謂絕無而僅有者也然則欲長有家譜而求亢厥宗者固有不在於功名富貴之外歟此譜之脩續者為親而作初非為人而作也凡出於吾宗而或貧而賤而不通於文學之類而流落窮困者而可不念而恤之歟其在祖法有不義當黜譜為諱其名字但書曰某而不絕其子孫者此又譜之所以為忠厚也况解氏在今山西固多而江西之族甚少其在廬陵吉水安福永豐永新萬安新淦纔數房又皆不及鑑湖之盛為鑑湖之子孫者尤當凜然於斯也舊譜無序先人以為不欲載之空言然予竊惟世年表記諸作可謂盡善而世未之知故序而傳之使凡為譜者或來取法而有所激勸不為無補此又區區之用心也



重修解氏族譜序

丁丑

余方脩族譜曰予將爲天下譜法也或曰不其誕乎且天下之取法有歐蘇二譜其法茂以加矣曰嘻茲非滯於見小而不解耶蘇氏譜獨詳所親余嘗謂其用心之不廣歐陽公稱其族來自唐末不顯乃不知萬安有梁國公墓碑尚存寔沙溪之祖本周將臣與宋太祖爲布衣交太祖受禪義不屈其沒也太祖強封焉則歐公考據之太謬亦且未嘗履歷於江鄉耳至如曾子固作譜而與史記諸書皆不合王安石作蕭世基神道碑以乾貞爲南唐年號二公尚如此故知國史易考而家譜尤難也解氏譜自西漢至今洪武丁丑一千六百餘年將六十世更數人之手凡幾大亂纔五六播遷至宋咸淳間人發芙蓉山王夫人塚前

地得世系碑遺像具存墓碑亦在焉先世從祖江華公龍翔得以考正述作知在漢則有代丞相福司隸光東漢雲中侯勝西晉揚烈將軍結齊高士叔謙魏都督天嘏周大司空忠鯁唐開元學士崇質金紫光祿大夫琬皆本世系刻石藏之墓前者則朝奉公世隆也江華公善書能畫於是因宋熙寧進士濮州公吉甫所脩增益驗事而置副本甚多嘗置從祖田下房如山家收遇春秋時祭若忌日則展示焉元季之亂其嗣一藏民家爲寇焦烈一寄虎丘山觀爲從父德先義士取去失於水寨幸先祖妣大夫人徐氏以的本遺像事略裝其行李家君還自燕剔軸懷之崎嶇隨身屢失屢得出入鋒鏑靈誘賊寇皆神事之數見夢家君隨所求獲此固非天耶事別有記洪武壬子從祖季

通先生持事略參取宗譜則宋紹定間從祖樛散老人一
龍所脩北江華公詳略異耳比族所以存此以從祖叔母
金壁鄧氏亂中揭與田簿相隨庇依孫鄧家爲義士得寶
無壞斯亦天之意矣予自幼務此叅之傳記訪之遺老廣
之於異聞歷之於山境舊居必履指古墓必拜掃名家媼
譜必借觀而詳審焉先祖片言半語必手抄而質問焉抽
金匱石室以驗於古考曲譽妄毀以徵於今自生七年至
於二十年間未嘗少懈洪武庚午將還京師從兄朋從嘗
共脩事畧一卷亦頗明直然而尚恨未爲平陽之觀而下
鴈門之拜也鄉之遺事則頗審矣尤恨於洪武甲子從兄
簡約復見世系碑於水南民家叅之所傳較若畫一擬從
輦取則其家見火光蛇怪其上椎裂粉散無復可求矣此
兄亦嘗以爲痛惜是用載謀刻石槩梨以廣其傳其歷代
以來名人鉅公翰墨文章巨編大帙難可備存姑摘其不
可遺者著之若家之學士忠賢女婦貞烈則無不傳其詳
而愚不肖亦咸載焉提之以世次而昭穆不可亂矣表之
以族房而親疏不可間矣徵之以時世而廢興之故交游
之事不可誣矣存其遺書而流風遺韻可得而景想矣志
其葬埋里居而慎終追遠之事庶幾備而足以使人興起
矣誠使天下之譜皆如是之明切也亦區區之用心故曰
重脩解氏譜爲天下譜法也

解氏族譜題辭

吾宗得於天者何其盛不得於人者何其阨哉天定勝人
久而必信人定勝天偶然一時耳安知非至阨焉以爲至

盛乎解在春秋之晉揚幾不免於楚張侯恐血制盛未聞
功賞孤纔德舉年不及施連世浸微漢興福爲代相后雖
位侍中僕射不大顯延年經學不傳乃傳他人萬年教陳
湯立大功不賞竟罪徙燉煌東漢至勝纔得世襲侯爵國
除復微至梁鄒侯父子顯魏晉遭賊倫之禍宗族流離六
朝十姓之亂數著功名亦數禍敗至隋大將軍忠鯁行兵
法天死世但傳其書公琰事高宗至玄宗傳稱爲小人讒
譖數屈黃巢之亂世隆舉宗奮義障吉陽全活甚衆纔得
朝奉卽告身數通而已彭玕劫衆歸馬殷時先制置公不
從亂亦活萬餘人終身不言濮州公不愧於蔡京父子棄
官隱居太原王佐宋高宗立殊勛沮於秦檜奮鬱以死元
氏編脩宋史史臣亦私憤不著其先世里居但云不知何

許人吉陽侯暉有文章而史云鷲猛木強荆南制置潛忠
義天知貶死南安其戰功甚多史不爲立傳評事公子宣
於董德元爲至戚德元顯附權要公貽書切責不與相見
江華公龍翔歿于王事夫人江氏能復其仇亦無褒恤國
學公莊山先生以賦斥賈似道擯處于家易國公誠三世
爲公竟亦絕享太史公元亡死義子歿北方一門勤王戰
殞相繼伯中先生兄弟連舉海內知名爲世所忌擯以不
第後伯中奉詔脩三史論以宋爲正統小人齟齬拂衣竟
歸山泉先生逃僞漢之徵辭鄧禹之見若是二千年來徵
辟不就道納粟不受官者譜不絕書世不易業視當時鬼
蜮能爲禍害雲化煙消死生堪羞耳正義不謀利明道不
計功吾宗有焉不致怨於人亦不責報於天天定勝人之

說吾姑爲此譜發有萬子孫觀於此者庶亦將有所感也夫

吉水桑園周氏族譜序

吉水桑園周氏雪江先生諱志遠仕元爲東宮說書其猶子子直爲太學先生君子與同出入於大司徒楚國歐陽文公翰林學士揭文安公之門子直不幸蚤卒獨雪江與其弟靜隱達泉交游於鬪爭金革之會復際明時予少得侍杖屨聽其議論及其世系私竊識之後其幼子子用馳美譽博涉經傳尤長於史學得與之同鄉校予方脩家譜歷訪名宗質其疑難子用剖析據於周氏譜又加詳焉其曰吉有周氏顯者大抵皆出烏東皆曰烏東系出公瑾而不知公瑾何以有後於烏東有不知讀史者指公瑾出

都鄉侯有以公瑾爲漢周景從孫以忠爲太尉以異爲洛陽令則又讀史三國志誤之也瑜實景孫而陳壽以爲從孫忠非太尉而曰太尉洛陽令暉也而以爲異耳暉異遇害董卓而壽亦不知故曰其誤之也今新塗峽江鎮有周瑜將臺臺下有廟去市中北行可數里故漢巴丘縣治也本傳云下廬陵留鎮巴丘即此也後云道卒巴丘則巴陵之巴丘縣地志者弗考誤以臺爲墓遂致論者爭言其卒在今之巴陵墓在今之安慶宿松而不知其留鎮實在古之廬陵今之峽江也瑜二子長循早卒次胤都鄉侯罪徙廬陵後當召還卒於烏東長子豫龍都尉居汝南少子泰留守塚廬陵此公瑾之所以有後於烏東也其後子孫散處若今廬陵之觀草永新之厚田安福之後林泰和之爵

解春南先生文集 卷之五
九
譽里吉水之泥田樞坑是也桑園之有周氏由吾仲山翁
自樞坑徙也仲山翁之先屢更世變譜牒散逸其世次遷
易之詳也莫可考見此子用之辯同予少所聞未嘗敢忘
不幸子用早卒今年其兄子善子彥與其族人咸相謂予
曰惟子上及聞諸老之言與亡弟為莫逆又於氏族之書
號能辨博庶幾下足以啓慈孫之心上有以正史傳異同
之缺不可無一言著於譜牒之末庶乎可以祛其疑後世
有賴焉非惟族人可以祛其疑後世有賴焉非惟族人獨
私感之予辭不暇則遣其子孫恂來京師求之予不得辭
為著子直等數小傳記舊所聞敘之如此云

宋氏重脩族譜序

予少時讀鄉先生劉公岳申所為青原捨田記稱宋長

故聯魁家輒從家君質問其後賢得宋君若璟而與之交
出其譜牒系緒明甚且嘗同過吉安城西觀長者所建塔
云吾家世聯魁子孫必有興者此塔所以識此吾高祖遺
言百餘年於今矣予謂宋氏自天聖聯魁至此既三百年
尚未有繼者若璟為之太息不能已予亦為之悵然也既
而若璟復居廬陵與長者之居相接延客發其家君書出
三世遺像請予贊以譜序為請予曰此聯魁譜也而先君
長者有遺言必有繼之而後序之未晚也若璟躍然謂中
子環曰是責在爾其藏以俟及永樂祭未之秋環以治尚
書褒然舉于鄉若璟在吳中貽書謂予曰聯魁譜序可作
矣予亦欣然答書可之明年環以其譜來且致若璟之言
予廼因朝退之暇取其舊譜書而序之曰宋氏自漢中尉

昌十二世孫晃以後世家廣平後十二世至唐宰相文貞
公始大顯後世至紳唐末爲御史中丞以言得罪始家開
封之雍丘五世至宰相元憲公兄弟以文章學行復大顯
所謂聯魁家以此元憲公之弟景文公子孫尤盛若璟之
高祖長者諱崇甫景文公之代孫也自元初徙家廬陵若
璟之父始居吉水若璟父子皆生於吉水而復居廬陵者
不忘其所自出成公之志踐遺言也予爲茲譜之序所以
重慎而不輕取必於二十餘年之先者致愛於前賢而將
有所激也環今擢進士甲科爲翰林庶吉士自視於景文
公兄弟爲何如也於文貞公事業爲何如也廣平之譜有
文貞公可書也雍丘之譜有景文公兄弟可書也廬陵之
譜將何以繼之也凡廬陵之子孫孰不爲之惕然也

吉水泥田周氏族譜序

廬陵烏東周氏自吳都鄉侯胤始胤瑜之少子謫官而卒
因葬焉子孫留居甚盛千餘年於此矣隋大業間有曰汾
翁再仕爲會稽刺史避難因家袁州北門復徙烏東子舉
仁傳數世至唐丞相墀亦其後也舉仁之五世孫四承事
號沂濱唐長慶中授徒吉水之泥田葉氏妻之以女因徙
家焉一子整仕唐大理評事四孫顯盛析爲四房其第二
孫二十五侍御諱廷光仕在唐末先祖都督公居南山居
相通也以女妻之侍御生國儉國儉生政肱政肱生文佺
文佺生仕勝仕勝第三子山甫生致道娶李氏壽百有四
歲宋紹興五年恩封孺人致道生諤字鯁臣元符崇寧中
在國學與安城劉雲龍爲同舍友晚稱涪齋其卒也劉公

解春先生文集 卷之五
爲哀辭墓誌今見才邵集中楊文節公有浩齋詩予總裁
永樂大典反復誦之而知其後嗣福澤之未涯也浩齋生
尚文舉于鄉尚賓尚志皆以三舍法陞仕其季尚忠號了
了老人從游文節公之門其子彥宏號虎溪年八十乃卒
第三子壽伯字椿年號清澗博學者德宋亡元興所以維
持江鄉殷裕家業中興涖田之族爲世家之光卜築泉溪
規模恢廓豪傑之士也一子琦字廷玉號雪堂繼其父志
益以弘敞當時士大夫莫不敬羨之尚友劉先生爲清澗
銘其墓至今讀者知清澗爲豪傑者以雪堂爲之子也雪
堂之卒也大司徒楚國歐陽文公爲之銘其墓以道學稱
之二子齊字方平號樂泉筮仕爲西海道勸農使延祐特
恩調廣福都監同知太和州階奉訓大夫勳飛騎尉壽永

豐縣男子志安仕爲永順安撫教授元定仕至奉議大夫
知孟州雪堂第二子雲字天瑞號茂初筮仕同知永昌府
太常禮儀院以明習國典舉授社稷署丞先是雪堂別構
于里之謀陽而署丞公寔居之其卒也廉使吳公伯尚銘
其墓三子長曰都字伯洵太學生郊字仲源號源源予嘗
爲之表其墓繼清澗雪堂柱石其家者也源源三子壯字
宗震有子子省子堅子殷晉字宗偉有子子鼎夷字宗坦
有子子宣署丞公季子曰鄰字季濱有子曰孚字宗信有
子子嘉皆能承其先德者也宗坦以譜牒爲重求予爲之
序予按侍御公於先祖有甥舅之親今數百年而子孫猶
相與往還知有考也侍御公之子孫固盛矣其他若訓之
爲御史中丞從龍之爲廣西兵馬鈐轄澤之之擢宏詞堯

章之同知循州世國之直寶謨閣叔圭康叔之魁科甲君
弼君實之舉童科蟬聯震耀於前代不啻數十百人難可
枚舉近世以科第著者若聞孫爲真文書院山長有名元
季國朝渠仲方爲台州同知從善爲吳江丞以文學顯
著彥奇由給事中僉憲雲南孟溫知黔陽縣岐鳳爲大學
正惟序爲刑部主事仲容公明之典教黉泮今與予同事
文淵纂脩大典如德巽與公智相繼爲學官皆其卓然者
也以武職顯著與中之爲清遠衛百戶克勤爲鎮撫是皆
評事公之子孫也何其盛歟其有析居永新安福新淦新
喻隨處而盛者皆泥田之餘慶也又扶益國周文忠公之
祖正始遷柳其孫詵仕爲吉州判官復與泥田通譜而取
孚先之子壽耆爲孫公之文集可考皆出於烏東者也謹

牒修於宋淳祐戊申暨元大德癸卯泰定丁卯皆嘗續洪
武甲寅中重輯而脩之者評事公十四世孫觀國十六世
孫靜安庭椿景良恒吉仲源景容十七世孫煥伯尚文十
八世孫孟泰也今宗坦拳拳以宗譜爲念亟徵予文晚生
末學何能取重姑述所聞爲之序云

夏璜劉氏族譜序

安城劉氏系出任城兄弟二人曰瑕曰璞父勿彥仕西晉
爲太傅掾娶司徒魏舒之女瑕仕爲安城太守夫人從之
隱居安城人以爲仙去今其居址猶存所謂南岳魏夫人
壇是也瑕生三子曰賦曰賒曰賄賦後不顯賒徙居潭州
賄生三子承貺承崇承羨承貺二子曰謙曰某謙居安成
之上村世有顯者所以謂上城劉氏也其曰某者居泰和

之九州承宗字景弘徙居永新中村長曰某次曰素素生
沈字冲之宋仁宗時宰相世所謂後隆劉氏也承美居安
成之下村生六子其次曰知遂生通真通真元賓亦以儒
顯知遂弟知岳有孫諱弁字偉明元豐中舉進士甲科仕
奎知制誥其居雲龍鄉也人皆稱雲龍先生有文集行于
世益國周文忠公稱其可繼歐陽公是也此其舊譜所載
也余嘗考之丞相沈自敘云系出安城蓋承崇之裔孫孫
相去三百年嘗十餘世乃至景弘其曰承崇字景弘者傳
寫之誤也丞相三子曰瓊曰瑄之後曰某復居于安
城性好獵因至吉水之夏璜社下有樟林甚茂犬逸入其
下不見遂治居室徙家焉傳數世當南渡之初以保障功
得仕爲吉水縣主簿生二子長元可次時可性仁厚家富

累千金三男曰志吉曰志義曰志德志德生則賢則文則
賢生德象德象生汝霖汝哲汝完則文有子曰德幾無子
以汝哲爲嗣汝哲前妣先大夫人之女弟也少時嘗過其
家知其事之詳其家先世皆好古博雅儒術尤盛先君子
每能言之元季志德舉義兵賊焚其家譜爲人竊去汝哲
今始求得之脩完考正請予爲之序汝哲自爲童子時從
予兄大經學時常以家譜爲念及後從父歷涉艱難人稱
其孝義及其長也孝友敦睦豐殖其家交友之間人無間
言篤於族義竟完其家譜於數十年不可考證之後可不
爲之難能者歟安成之子孫多矣其間能如汝哲者知復
能幾人而凡同源而自昧者視此譜能無愧乎則此譜實
有所感發也汝哲之宗族與後之子孫其尚念之哉

吉水白沙王氏族譜序

吉水白沙王氏自宋南渡之先荆國公弟諱璟字子瞻始
建厥家今驛亭其故宅也子瞻二子次子端禮字茂甫名
進士起家有名生三子鴻舉字南賓鸚舉字南翔鵠舉字
南仲南賓有孫日子俊字材臣是爲三松先生其爾居因
茂甫之別墅今花園王氏其尤盛者也南翔宣和進士繼
美其父生選字舜弼舜弼生岳字德瑞德瑞生可從可從
生百川百川生君佐君佐生信甫信甫生子清字德懋德
懋生天瑞字如春任國朝爲成都華陽知縣二子九成
九鼎九成二子吾省吾學九鼎四子吾隱吾貫吾周吾志
予既爲三松九代孫德基序其譜見立齋先生所爲序詳
矣九鼎復俾其子吾隱示予此譜蓋與三松同出於端禮

者也少時讀郡志已歎慕端禮祖孫之賢及見花園譜
其素志得著名其間而南翔與南賓子孫頡頏競爽若舜
弼有子曰德昭德明至今繁衍德瑞八代孫仕爲高郵州
千戶德明六代孫文德仕爲鳳陽指揮文武顯仕又皆茂
甫公之餘慶也况予嘗觀荆國公世系實出琅琊父祖以
上積德深厚荆公子孫居金陵者今雖僑寓他邑而撫州
之境平甫諸孫宗族猶能守其家聲予亦嘗爲之序其世
系而知荆國之先人所積累者初不以荆公而有衰謝也
今白沙花園兩族相望指顧之間思水木本源之義詩書
忠厚之傳可不以先世爲念而薦於親親之摯歟若其功
名富貴則在於天得之者不必以爲族人侈不得者不必
以爲族人歎族譜所以追念祖宗而垂訓後人也

螺陂蕭氏族譜序

吉水螺陂蕭氏其先自唐丞相復子儉家長沙其裔孫霽
吉州刺史楊輅之甥也仕爲楊吳武寧令始遺言謂其妻
子家螺陂三世至定基化基世基始大定基官至殿中侍
御史有傳其後多顯至昭甫再爲御史益顯世基爲龍泉
主簿其後以深夫爲提刑大顯化基爲贛縣簿其後蕭夜
又諱興以武功至武翼大夫特顯今文獻存者定基神道
碑王荆公譔蔡端明書其他石刻列置檀橋院詔敕藏其
家譜牒明甚祠堂翼然名公巨卿歷代有述不待予之贅
美也

歐陽文忠公家譜序

廬陵自春秋戰國以來爲吳楚文物之地伍子胥孫叔敖
之徒多有遺迹若新塗子胥廟在羊山廬陵教城叔敖之
故居斷碑殘碣往往出於荒榛瓦礫之墟傳記所不及采
史官所不及錄後世所不及知徒秘於私家子孫相傳今
千數百年予猶及見其一二得以補聞見之遺迺知歐陽
氏譜比今世所傳文忠公之所脩續蓋猶未得其詳也按
宋仁宗嘉祐之夏四月歐公歸廬陵得其譜於吉水與其
所藏者叅校而刻之瀧岡蓋草草旬月之間耳宜其不及
詳也余嘗過萬安見梁國公墓穿碑石獸歸然尚存國公
諱忠與宋太祖爲布衣交梁國其追封也今宋史不及載
而文忠公譜亦不及錄推其闕遺者豈不多哉文忠公平
生亦念念於廬陵者故不遠數千里歸葬其考妣刻石表
阡期以不壞此其意可見也而或者咎其思穎而不思吉

此豈知公者哉公沒後發奕辨子孫相繼歸於廬陵然皆始寓于新塗之萬全蓋歐公之歸時李太伯在臨江公託爲買新喻田宅以居故也吉水同水鄉臻善里則自發之孫紹世南渡隨高宗至杭都堂審給部符今在迹符余猶及見之此其最可信者紹世生日俊日俊三子長曰雲居迹符次曰霖居新塗季曰雱字季澤始居吉水之螺陂雱生克用克用生炎起新昭州教授先六世祖生春之姍姍也炎起生夔旗進士靖江軍節推節推生吾行吾行生師尹諱衡至正庚寅貢士號莘雲予少時嘗從講學令子仲訥與予交莫逆予元大經其妹婿也莘雲既沒仲訥亦蚤世其譜藏予家仲訥有子孝忠少鞠於予家於其長也授之譜與文忠公畫像俾謹藏焉永樂四年丙戌孝忠來京師將謀刻之梓以遺其後人而予爲之序其事如此且俾知此譜蓋連世脩明之比於文忠所輯爲尤備也

城西蕭氏譜序

縉少時讀家乘媼盟記見所載自漢元至元赫赫富貴非一家但里閭可指顧而及者則以先生長者問其門屋所在子孫尚隆替與否或喞然笑曰是其地者昔其崇墉奧室今其荒榛敗甃而子孫莫知其亡適者也或曰是疑即今某所居而肆而圃蔬而田而池者或戚然而悲曰是其子孫固在而窮而愚以不學貧以不立者也或欣然羨而昌言曰是即某能世其家不墜其先者也不顯于時不凌益競者也辭色三變縉固已疑其然其所以然不能細也稍長而備貞法從抽石室之秘荐見天下之書交當時之

士於是吾鄉媼家比嘗赫赫者始盡窮其細而後知善惡之驗於人子孫甚較著彰明不幸而不驗者則甚少也城西蕭氏濟寧將相名家系出鄱陽王後十七世至護軍蕭忠國官廬陵凌子文仲來婿吉水張氏遂爲吉水人世家城西簪纓蟬聯詩書浸淑先族祖宋淄州刺史賓王諸孫如山婿雲岫護軍七世孫也先外氏封州高使君若鳳進士公鉞於蕭氏皆重媼疊姪積善流慶日新月盛方殷未艾復始可期縉於媼家之末方與有榮焉者引高持此譜來請序三復嘆歎益知護軍而上將相勛業富貴璀璨又大有盛於近時者故家世德有如此哉予安得不反復深嘆其十餘年少長之間之聞見也歟引高名嵩中護軍之九世孫云

吉水倚傳蕭氏族譜序

太史公記許由事言登山訪其塚班孟堅自叙亦識其先祖葬處指可徵信於後世者非明空也今吉安自隋始爲吉州漢爲廬陵郡而吉水置縣在南唐保大八年耳吉水故家若劉氏自安成來曾氏以避王莽之亂至者類皆未有吉州之先也予家與北門袁氏泥田周氏永豐徐氏之類又在中唐之世未有吉水縣之先也惟白沙九江蕭楊二氏之先未有吉州世皆在唐末其定居于吉水則際於置縣之時而譜牒所載間有關遺也予嘗遍歷於鄉求諸故家譜牒而參考之則未有若今吉水倚傳蕭氏之家譜之且信也其源流記在嘉泰中丞相益國周文忠公作稱唐八葉宰相復之觀察湖南也子儉留居長沙儉生徵徵

生旭旭生晟晟生處仁爲吉州守尋還蘭陵寓于金陵子儼字茂輝復官廬陵迎處仁就養因家廬陵縣永昌鄉之富原今吉水之文昌鄉倚傳也儼五子其口元羽元鶚皆大官後皆不失爲士饒財喜義名宗如安福戴氏永新賀氏吉水解氏鄒氏彭氏顏氏水村張氏時貴若永豐木陂魯氏值夏胡氏永新易氏吉水毛氏段氏湓塘楊氏泥田周氏水北江氏皆其親戚此益公所序可信也及觀南塘書蕭儼傳前後皆合其行事歷官則不如家傳之詳也及觀螺陂蕭氏譜亦云其先出於儼來自長沙而不著其歲月御史服自叙云出於儼而其譜以霽爲始祖云霽舅楊輅公以工部侍郎守吉州因從之以策干楊吳乾貞二年爲洪武之武寧令死焉時年尚少遺言謂子孫必居九江

族遂葬吉水壘潭將軍山其墓在焉廬陵高村長官廟乘石存焉竟不著其父母意者霽之沒也早子幼既又徙居文獻中衰後三世至定基始克脩明其譜而宦游之日居多故不及考見斯譜要之的然與之同祖同出長沙無疑也至於此譜稱儼五子其一名元霽者豈即定基之祖歟至泰和蕭安撫廉訪譜序稱唐末五季馬殷亂湖南蕭氏有十四尚書文元先生兄弟五人同筮所避亂處得坎之繇曰遇坎即止遂遷于吉之盧源尚書後徙居大池上作亭扁之曰星潭以示子孫不忘其初之意尚書二子叔濟叔澄四孫曰佺曰保曰儀曰仁厥後蔓延散居于吉之屬邑曰江曰溪曰波曰源皆其族所卜居又水有不同而其曰濟曰仁又皆與九江倚傳之譜不異豈皆源同而流別

解春陽先生文集 卷之五 十一
者歟抑其譜中更顯者或欲愈張大其事序者非一人錄者非一手傳訛承謬不可盡信惟當取倚傳譜爲正者蓋數百年未易稿紙墨精好使人愛翫不能釋手處仁七世孫徽柔字時徽少與予善請爲手書一帙以遺其後之人又與之登所居之近御史山拜茂輝之塚穿碑漫漶石斲歎危而歲時獻祭其下者足相接也松楸望之鬱然也蓋如此譜非空言之比嘗遍觀於鄉之故家未有若此其明且信者也予爲手書時洪武丁卯今去之十有九年時徽來京請序予亦不爲空言也故記其所考論之實序之如上云

虎溪蕭氏譜序


余嘗過虎溪蕭氏之故居猶存蓋經宋及元而巋然獨如靈光之在魯其前人之厚德亦可見其萬一復得其家譜觀之始自南唐至宋而盛科目相望富貴赫然又觀其卜地益知盛族之不偶然少時聞伯輿先生名及拜巢雲先生與家君莫逆益知其世澤之長今三十年矣巢雲令子孟彬復以此譜見示皆宋元諸名公之翰墨輝映後先余晚生末學何敢措一辭於間哉但深嘆羨書所見者而歸之

吉水金壁孫氏江東譜序

吾友孫中鼎好學知本隆親於族恥其家歲舊譜考訪而筆削之九年乃成用心篤厚動可知已古源流自有熊立國公孫帝七世而有虞氏爲帝其姓姚商均不肖也遂以側微有虞闕氏爲周陶正武王婚其子滿而封之陳爵之

伏而賜之姓曰媯至春秋時公子佗事齊桓為工正更姓為田氏五世而有田書齊景公俞為孫氏食采樂安書生憑憑生武為吳將生明食采富春世家焉歷秦漢代顯漢末鮑為漢陽守卒二子鍾旃蔡鮑吳城山世稱白鶴塚是也鍾生堅堅生權帝吳江東封安成王於宜春袁之孫氏自此始後宜春析為分宜縣裔孫汝亢為分宜人宋英宗治平丙午判吉州族來聚處汝亢居廬陵之金壁其弟居水西有居水東富田市之西及居泉江者皆其親族而金壁為尤盛汝亢二子長震初居下金壁仲曰巽初居上金壁震初二子明復明譏明復一子某官至大理評事評事之孫孟敬有文名明譏宣和中舉進士官至太子侍讀同知松江府事有能名其孫仕清以孝宗淳熙丙午及評事

之孫孟敬並舉進士孟敬早卒仕清官至翰林待制文章為時所重丞相周文忠公極稱之與為友仕清生紹祖隱居教授多所造就紹祖生逢原逢原二子清淑家鉅萬薦於教子創碧澗書院以招來學生四男皆貴顯曰克順伸齋劉高仲極稱之銘其墓曰廷佐廷璧廷望廷碧於家君為莫逆歷官至正議大夫海道廉訪使清淑累贈至吉水縣子詳叔好讀書壯遊南北富累千金專事施予或勸其置田宅遺子孫咲曰吾以清白遺之子孫足矣魏國靖文敏公子昂為書清白家以表官至瓊州從事督海運提舉子廷震有文章稱公岐嶷而穎孝恭性成嘗觀其兄就學默已識通人皆異之及長長身玉立聲如洪鍾動止有法人皆服之廷震尤忠厚一其父風姿狀偉然談論英發而



解春門先生文集 卷之五
十一
恂恂未嘗自伐中鼎祖父也中鼎間持此譜徵予序余觀
楊文節公慶元丙戌譜銘其源流可信如此考之他志則
宋元祐七年割廬陵之同水鄉之新嘉里故上金壁仍廬
陵而下金壁爲吉水考之史傳諸書又無不合者偉哉中
鼎之善脩其譜也冒其姓者黜絕之嗣他姓者收之無後
當絕者繼之本其支派雖貧賤而必錄之紊其尊卑雖久
遠而必正之雖犯怨怒而必行之偉哉中鼎之善脩其譜
也吾聞國有史家有譜國史以直筆爲可傳家之有譜獨
不然乎信乎中鼎之是譜也其可法矣其永傳矣

嶺口龍氏族譜序

元盛時學士虞文靖公大司徒楚國歐陽文忠公以文章
蓋世吉水嶺口龍氏可廷光廷皆仕有二公爲文章稱道
此其人將與山川俱存矣予少時讀二公之文而景慕之
又聞季大父淵靜先生之言備述其家富貴顯融賓客之
盛詩禮之崇尚恨不與之同世也蓋淵靜與兄仲中俱在
龍氏師席與其三世講論而先公亦嘗與之交游於都出
入於學士司徒之門今予又與可廷子伯澄交游薦厚世
契之情誼豈偶然也哉其家故有譜兵亂遺軼伯澄懼其
久而或泯也乃自才世祖諱衮字君章以下別其支系考
其世次定爲一編題曰嶺口龍氏族譜授其從孫孟超請
予爲之序余誼不可辭也按譜稱自衮始居九江仕唐爲
持節使次子積徙居新塗之盤嶺積之次子懃懃生元高
又吉水嶺口之初祖也五世至瑞甫號無心翁仕元初其
沒也伯中先生爲之銘其墓其子季卿爲八作監副使三

男可廷仕爲温州府長史于廷爲福州教授光廷爲東安縣簿尚書兵部辟叅行軍府事此其極盛也季卿從弟季實號濟川與揭文安公交游仕爲萬億庫提舉可廷從弟時雨爲通州學正景廬號西碧爲撫州路學正景文公爲瑞州教諭從子惠遠爲蔣家巡檢九霄爲蒙古學正惠遠子公尊浦仕國朝爲靈副復以明經舉爲臨濠府同知時雨子伯符爲光祿典簿調廣西田州長史卒于官此譜所載仕宦之顯者也其有居新淦縣治新喻湘潭蜀之松子溪又皆自嶺口徙居也伯澄仲子彥偉居于谷村又至正年末也予觀伯澄之譜其族不以戚疎而有所厚薄惟欲其族人子孫咸懷忠厚景仰前哲其用心亦廣矣而其家富貴隆盛時使有侈靡紛華而無有能薦於詩禮以訓

以勗而學古入官者彬彬然安能施於後世哉予所以重有所感於先季大父之言而深有重夫伯澄之用心誠可謂能繼先人之志歟龍氏宗族當共勉而守之後將益盛

吉水橋頭彭氏族譜序

廬陵彭氏族屬蕃衍皆出於太尉玕玕之事蹟著於史傳著於郡志唐末之亂玕率家衆起兵往謁南平王鍾傳命還鎮吉水時吉水未爲縣故屬廬陵地而今之蘭溪曰相公坪卽其起兵處也倉廩營壁遺址具存其前有張欽寨乃吳將屯兵與玕對壘之所後玕積功至吉州刺史後唐加太尉封安定王辭不拜薨於湖南後歸葬吉水之豐口諸子散居吉贛撫州三郡予皆及閱其宗族又皆不啻廬陵之尤爲盛也吉水鰲湖橋頭彭氏實玕之裔孫蓋與豐

解春河先生集 卷之五
口墳墓爲近洪武戊寅予與楚持上京師舟中語及宗譜
楚持嘆息自言去太尉珩二千世矣不幸譜燬于兵六世
祖以上闕焉所能詳者六世祖層寂翁穎異嗜學善談論
鄉稱遺直焉娶蔣氏二子長萬山翁尤好施予人皆義之
娶蕭氏二子長景元壯游四方負氣豪邁娶南岸張氏一
子君義性至孝娶灞上黃氏三男仲珍當元季傾家舉義
兵謁叅政危公保障鄉井楚持之父也嘗自太尉以下闕
其不可知者詳紀其實以示後之人予甚喜其不泛不誣
也今去三十餘年而楚持以所著求爲序故畧著太尉之
事本其鄉里墳墓以爲之證云

鏡方彭氏族譜辯疑序

辛巳

甚哉公議之難明也而世謂嘗明於身後非謂 國史

傳足以考信歟未也時移事去過其舊鄉詢其故老稱人
之善者無所佞諛言人之不善者無所避諱考其成敗之
迹與其言之遺以推原其用心庶幾足以知之然猶未
也國史固不足盡信賢人之隱德難知而凡傳記所說私
家之所纂錄或友朋私與其所善子孫欲蓋其所親亦有
姦諛未死之先逞其胸臆之見筆之於書以授其人令身
後出之以爲信實是非錯謬又有甚於國史之傳訛昔人
有言人無所不至惟天不容僞欲知其人之善惡是亦在
弁視其子孫之隆替可以徵之也唐末五季豫章廬陵之
亂極矣鍾傳起鄉兵策功至通顯已而驕恣其下復亂賴
危全諷彭玕兄弟起而救其弊粗定一方傳奏全諷爲撫
州玕爲吉州雖由傳所薦實唐室之命也揚行密既背唐

以自爲則脅江西從之獨全諷及玠不從仍唐刺史之號
各守境土以拒行密則二人者特立不從亂固唐之忠臣
也厥後勢孤援絕不得已而奔馬殷未嘗爲之臣也殷亦
念同盟以客禮待之獨鄉之傳聞與私家纂錄多毀其務
報仇爲剽擊劫州人往臣於楚蓋是時全諷死光稠降玠
既去而行密盡有江西鄉人亦有仕於楊氏矣玠固楊氏
所惡也則其毀短玠者非私怨則爲楊氏惡之矣玠之不
死宜必有以報唐室者不幸梁唐繼篡志不獲伸惜哉又
其事多散出於國史不得其列傳獨其子孫之盛有非私
家所得而抑之者蓋天之報之也故翰林危公大朴嘗叙
其族出於全諷建昌撫州之有危氏猶吉之有彭氏榮盛
相埒兩家善慶之積公議之明亦可得而徵也予友彭君

予斐以家譜來 京師名鄉鉅公既皆爲之序乃以示予
予頗通氏族之學請著予所聞以考正焉譜稱彭宣氏事
漢成帝爲大司空而北齊陳留王樂其九世孫予按宣事
孝哀以二千七十四戶侯長平薨謚曰頃子聖孫業嗣侯
遭王莽始廢而譜畧之成帝下距北齊將四百年未應經
九世疑上當有十字蓋譜之增續傳刻屢矣微或有此遺
脫也又云陳留王六世孫景直值唐中宗爲禮部郎官其
後有構雲天寶中袁州刺史李景以名聞上遣中使齎送
立召之至再乃行上欲官之辭歸遣中使房嘉送之加賜
束帛號其鄉曰招君有震山釣臺石室其所居處今袁州
宜春也予按宣家淮陽樂家安定而景直但云世居淮陽
豈遷徙不常故畧之歟中宗時距天寶未遠景直構雲非

父子則祖孫耳譜稱構雲之子始家廬陵而不著其先以何時居宜春予以他書考之蓋自景直之先隋之季世而譜失其名不敢妄加蓋謹之也又云招君之子茲憲宗時進士爲進賢令三子伉侗維岳皆進士而侗登第在德宗貞元七年爲令宜春父茲登第在其後蓋茲十七生伉十八生侗登第時纔十九茲登第時年五十二相去十六七年耳以年少榮升而父差池晚世固常有此也侗生輔信州長史五子珩其第四子其世德既如此譜稱其乾符初授筆舉義兵予按不著其居里按史稱珩世家廬陵今吉水永豐故廬陵縣地南唐保大八年始置吉水旋廢雍熙元年復爲縣致和元年始置永豐今永豐之沙溪吉水之豐口墳墓具在珩以後唐長興四年癸巳三月薨年八十敕葬長沙楊氏太和之五年也未四年而楊氏因亡始歸葬折桂鄉之豐口珩之生當在唐宣宗大中七年癸酉起兵時纔二十餘耳州志稱平湖有彭珩疑塚珩居必在長溪豐口之間其爲吉水人無疑也又云乾符丁酉謁鍾傳命鎮王嶺按王嶺在今吉水之蘭溪其上倉廩府庫之迹猶有存者其前有山曰張欽寨乃吳將屯兵對壘之所初珩以門第領胥徒爲州從事即棄去歸鄉與兄弟治兵王嶺非傳命鎮也傳命以中和二年觀察江西而撫州亂賴珩及全諷平之傳始止其功爲刺史未嘗私謁傳也譜稱乾化初授檢校太保後唐長興壬辰加太尉封安定王以疾辭不拜予按乾化之時馬殷尚在羈縻莊宗克梁殷始入賀珩不與偕行其志可見長興封王之命猶且辭之

朱温太保之命其不受可知矣然則但稱吉州刺史者固
玕之志歟今吉州自唐初所置故無城玕始築寧季丞相
江公萬里爲守以兵少減其舊之半其故址襟山帶江雄
據要害元季措置緒餘猶可想少年起事白首臨戰干戈
從容不廢講學真豪傑之士哉故楚國大司徒歐陽文公
以爲使吉州遇時得君當不在郭汾陽下不虛語哉然予
嘗過華州仰思汾陽之風低回其故里而訪其子孫又不
如彭氏之在吉者遠甚彼此先後所得又何較哉瑋長子
世家廬陵顯者有博士齊太子中允應求賀州刺史君醇
御史中丞思永程伯子其壻也其在鄱陽汝勵治平進士
第一吉水豐塘有方迥寶祐南省第一人其在鏡方有應
瑞應星應祈方畧晉起予皆進士子美叔季新叔士龍九
齡必達士傑禹王德高子明子承仕皆有名吾子斐其後
賢也增脩是譜其善承先祖之志哉

吉水姜氏譜序

姜氏在蜀爲名家所居之重慶城中曰孝慶坊以其家得
名也至宋末有諱未者仕爲統制子紹甫當元初仕爲吉
安稅使二子孝祥慶祥孝祥仕爲福州鎮撫慶祥號愚溪
爲吉水仁壽鄉盧兜王氏婿因家盧兜生四男芳深益深
芳遠益遠芳深四男所安所文所止所及益遠二子用存
所存芳遠三男所容所諒所韶所及生仲攸用存生伯攸
所存生伯偉伯俊伯侃所容生具瞻民瞻仰瞻所諒生從
瞻孫曾林立自愚溪至今五六世矣表叔徐君夫人姜氏
予幼承其飲食教誡知其家法之嚴世德之厚而伯攸父

子兄弟往來相與如家人伯俊與共學同應江西進士舉
又自京師同舟還鄉里交情濼密成器又徐氏之婿良
器今爲縣學生又予妹婿也脩輯舊譜求爲之序其家族
業儒隱德之報蓬蓬雲興其所藏名儒翰墨有若先外太
父灞雪高公申齊劉公揭文安公虞文靖公皆燁然足以
發其幽光而庇其後嗣者也伯俊在太學成器仕而歸皆
嘗求予序其譜因循不果爲今良器之脩輯加詳而伯俊
成器皆已矣其所以食祖宗之厚德而致名位之顯融其
所以爲祖宗之激勸者其必有在於良器也良器勉焉實
而詳曲而暢謹而不妄予於是譜諒焉登名是譜者皆思
所以無忝而后之子孫善繼善承是又良器之所期而望
也

吉水東門徐氏族譜序

吉水東門徐氏其先金陵人至宋乾道進士杭州通判徹
充顯名其後益盛大通判字時敏有文章學行其沒也葬
東山楊長孺爲之銘其墓夫人戴氏廬陵之世家生三男
其季宣教郎茂賢能世其業五子受字仲容明字仲德亮
字仲昭榮字仲華璠堅字仲識亦皆爲儒仲華治書經有
名人稱華峯先生通判諸孫尤賢者也仲容三男南宮字
岳鄉南皓字廣鄉南老字壽鄉 子南祥字瑞鄉胙字
飛鄉南省特奏第一人時稱少九殿元是也華峯以漕舉
妻名授迪功郎合浦尉學者稱清溪先生素以貴豪而愛
人喜施次日南崇字德鄉南齡字椿鄉南敬字簡鄉仲識
二子人傑字叔儒人英字叔秀皆通判曾孫也岳鄉二子

文賢字季直文彬字季章廣鄉子文煥字師堯壽鄉子文
蔚字季父瑞鄉子文粹字季輔文璧字玉成飛鄉子文潔
字季玉清鄉子文燦字季昭堯繼父志鄉稱長者其葬也
遇異人指示吉文水西謹口上此子孫顯盛後如其言文
龍字季從文海字季琛德鄉子文慶字季壽文度字季宏
文奎字季賢椿鄉子文炳簡鄉子文哲字季甫文顯字季
忠文貴字季文叔孺子文博文郁叔英子文敏文濟皆通
判之玄孫也於是五世而季昭有子曰壽字仁叟號平遠
家富致鉅萬元初以賑施事聞旌表其門得仕爲稅使監
官所至以惠愛稱揭文安公至以黃丞相擬之三男玉立
國佐號坦然國瑞號瑞雪國祥號祥雲坦然五子指南斗
南城南東南起南瑞雪三子周南自南泉南祥雲一子世

南競於勤學在元盛時賦聲撼場屋先君子筠澗先生與
城南世南俱避兵吉文水西相與爲歌唱和傷時撫事忠
義激揚其遺稿具在予每讀之未嘗不爲髮立汗下也恨
其生也晚不及追陪下風親炙儀刑聽其餘論城南嗣子
學皋歸然晚節衣冠談辨先達之流風尚在也學皋令子
叔通叔遜叔迪又出示其譜裔二通其一則自南旰藏本
其一則學皋所藏而城南君子之手筆也於是通判公至
叔通兄弟十世矣一門群從郁然競發平遠公之福澤尤
未艾也予惟徐氏自嬴姓偃王之後歷江左至唐有功以
陰德顯五代之際温雖擅政然亦不可謂無功德也是以
其子侍郎公始居吉水又五傳而知道思道兄弟孝友靖
康之難共其母走至水南知道流矢中額血流及屨猶不

輟行遂卒人皆稱徐孝子厥後思道果得官至楚州團練使是生通判君才堪台鼎而仕止州郡是以有歷世之報至于平遠積而愈厚食報益歛仕止慶之所鍾必將有待宜叔通之拳拳於譜俾後有所考見爲善不怠也歟世言驟興暴發蓋常或有之然不知必其五世十世之間有厚積而人不及知其間一二世代不幸不學流失其譜牒而子孫不得聞是以懵然以爲真由已之能自致此富貴也已以驟興自聚而人亦以驟興鄙之棄其祖德於無何有之鄉此與動植無知何以異哉叔通既求爲之序而且與續其世次於晉凡爲徐氏之子孫者尚思所以寶傳之哉

山陂龐氏重修族譜序

永樂四年八月吉水山陂龐氏明叙奉其叔父文遠所脩族譜求爲之序予方嘆吉之人士多世家而能脩續其譜者十無一二但持其舊譜以誇示於人而新譜設不加省指其本宗以矜眩於已而族人謾不加恤且徒知以富貴名譽爲高而昭穆尊卑或泯焉而不知察其脩習者因恬而不知恠亦何貴乎舊譜之存也今文遠此譜自七世而上以元季之亂悉燬于兵定其所知者爲新譜六世祖叔達創置祀田百畝歲時領所入以祀其先而族始大叔遠有子五人曰季安季容季雲季遠季文皆讀書應進士舉增置祀田又二百四十畝宋季從信國文公舉義兵傾其貲不恤也四世祖良甫又增置祀田合前後爲五百六十畝課耕桑者二百餘戶以供祠事百後其盛蓋可想見

五十年於此矣明叙之祖弱翁希凱之少子而文德之季父也文凱且死弱翁尚少文德長矣又冢孫也於是呼文德而勵以弱翁曰謹視之俟其長也授之田三百畝已而文德無子字弱翁曰明義而以子畜之弱翁弗居也遂告於族兄選翁爲之說而更字弱翁焉弱翁死文德復以其子文方爲之孫不幸早卒又十餘年於此矣明叙不忍文德之無後嗣也迺告于宗鄰取族人之應繼者明知之弟明魁以爲文德後恩義兩盡而族皆以爲宜其昭穆甚序也譜之源委則始祖之居曰馬田其分派者曰桑村曰山陂曰白石宗譜族數百人皆叔達之裔孫也叔達之先相傳自袁之分宜來居此舊譜所載不可得而詳而亦所不必詳也於是新譜之有益於後人者至矣先君子當元成

時與字六昭者同游北京最相親善及予壯而識翁與其子孫明叙少孤依林外氏以長於予有連也故嘗從予游將復歸山陂有志未遂予記曩時過山陂見古栢參天池沼縈帶崇牖甲第與溪山相照映益擇居之得其所宜其子孫之久而益盛而不知先世之積善如此其至非尋常比也其家之豐殖將與此譜爲始終其盛未可量也

王氏族譜序

先六世祖生春先生東門王迪功之婿迪功諱有開字仁叔學有源委理宗朝以累舉贈官母甘氏恩封孺人一門儒學之盛與予家相頡頏仁叔有弟諱克開字子周學問競爽開禧丁卯鄉薦恩科任福州司戶改丞江華於先六世從祖巽川先生爲同官其先金陵之世家也予嘗脩京

城志書烏衣諸王皆故相家也至宋猶盛迪功之祖諱國
器字彥昭宋紹興初始避亂米居吉水吉水上橋田氏因
婚畜氏後徙居吉水東門尤善教其子生四男元初元茂
元正元大皆有學行而家富累千金迪功元初長子也迪
功生季方季方生可炬可炬生廷會廷會生遜志生三男
伯淵仲良季淵皆予叔父行也仲良今年七十餘矣念其
家譜中經兵亂煨燼之餘掇拾記憶叅互考訂炳如也不
鄙予謂通於氏族之學而又世爲婚媾也俾爲之序以傳
予少獲事先叔祖妣迪功曾孫廷賢之女又知其家內政
之雍肅若此譜所載有諱恭叔明叔壽玉皆治書春秋爲
學官迪功四子皆進士曰季楚季方季忠季章也八世有
諱紹者在元舉進士有名予嘗見其自寫送胡小山詩清

標絕俗信一世之奇才仲良博學隱德不慕榮利喜爲詩
詞冲澹純雅百家之學無所不通信大雅君子也且成此
譜於兵燹磨滅之餘有功於王氏豈小哉

東門胡氏譜序

先高祖莊山先生締交存與爲莫逆存與字榮祖有子楊
從高祖學文行皆醇高祖以其子妻之楊仕爲學官以卒
其子士會是小山先生又學於予家與其弟士能嘗出其
譜系龍章索予之序題由是世爲親戚交游熟知存與公
實出於南唐吉州刺史公霸之後宋忠簡公銓之五世孫
也其譜系雖存於亂離之後而粲然甚明予不述自存與
以下爲吉水東門譜存與在元初家富累千金以保障功
爲吉水州判官遂家焉翰林學士邵菴虞公銘其墓子六

振揮揚拯持朴也振授浙東元帥府照磨揮授臨江路新
淦縣主簿揚授建康路儒學教授拯授廣東宣慰司奏差
持授順元路新安縣主簿朴授廣東元帥府譯史振揮拯
持不祀士會士能乃揚之後士能有孫曰端方好文學尤
繕寫命學於予其欲繼前脩之志不淺矣州判公之沒也
葬于仁壽鄉之上槎其祀田遇亂蕪廢士能出其私田三
十畝歸之於公與族人共祀其祖而恐後人不知其拳拳
之意也不鄙謂予通家子弟爲之序述其意以爲後人勸
予不可辭也士能號小圃隱德忠厚今其此舉存宋譜復
祀田繼先祖之志動後嗣之仁於胡氏承亢之功爲不小
矣而豈將無所激勵歟是大有功於名教也

劉氏族譜序

劉氏金陵人在宋有少一學諭來官吉水因家于城南之
巽湖上後湖決遂濱大江家世業儒學諭有子諱堯夫九
萬學知名舉進士仕爲南陽教授五子第子義甫五子
天瑞天與子源天祐天成初義甫有養子曰天輔本水南
蕭氏起家殷富而無子乃以義甫嫡子子源爲之嗣今子
源有子二人曰仲濂仲海而子源本天源也仲濂本日子
泳仲海本日子海以禮法正之天源合歸宗而子海爲天
輔後可也不然天輔本異姓而出之亦宜也明翁少子信
卿三男其季天韶少鞠於兄天性而日子韶也後既長有
子洪仕爲縣丞以卒天性復其序曰天韶人皆以爲天性
之能復於禮也今天源有孫四長謙仕爲中書舍人間以
其祖之遺命爲譜畚一卷復其彝倫以示後世是與天性

君媿美也後之孫子其尚有考於茲夫尚有監於茲夫
藍氏族譜序

吉有藍氏自唐中葉其先中山人也有諱昶字東明者仕
德宗朝爲台州刺史二男長曰晉字仲元生長慶辛丑後
仕爲撫州金谿令因家撫州次曰胃字仲舉長慶甲辰生
仕爲吉州丞因家吉水之富克仲舉生欽字敬已娶灞上
劉氏生二男文字貫道徙居萬載武字貫勇生成通丁亥
號曉竹居士與妻鄒氏俱葬里之石陂相傳以爲吉地曉
竹生準字仲平仲平生貞字正實正實三男辰字明宥已
字觀宿皆徙家清江照字文宿生勤字好敏仕宋爲進賢
尉子道字行中爲奉先縣丞二男成字大進宜春丞明字
大清長沙尉皆在仁宗之世大進子和生字友義大清子

順生字友和世襲詩書又五傳而至松坡五男曰文富文
政文興文俊文清字叔徵號瑞軒宋登仕郎象州來賓尉
德祐乙亥以義兵五千人從丞相信國文公討賊擢江西
帥閫叅謀此仕宋之尤顯者也文富生季文季尹季卿季
德文興生季淵季平季顯文俊生季友季益季岩季明季
保而文清有一產三男曰謂大謂性謂一者後皆以儒學
仕有官即鄉所稱三瑞也季尹諱聖舉號志伊仕爲金谿
教諭仕居之吉吉陽城南門四男曰民秀民吉民先民信
民吉仕爲提舉殊祥院民信七歲時入郡學庶使柳公以
嫩藍堪染綠爲對應聲云高柳已拖金公奇之呼爲神童
後御史李公薦之朝爲曲阜學正襄陽教授國子助教翰
林國史院編脩九轉而爲東平路推官以卒學者皆稱千

角春月先生文集 卷之五
澗先生復居于吉水之南城此仕元之尤顯者也季卿諱
聖選號樂山爲瑞州路儒學教授子民則爲安福州學正
民季爲觀山巡檢季德諱聖道生民望民猷民章民用謂
大生民宗民遜民表民立謂性生民初民本謂一生民壽
民瑞民祐皆以儒學顯名富克數百年來之極盛也際于
天朝而民宗已有子成已爲黃岡縣儒學教諭民望有孫子
貞爲都御史民信有孫宗聖爲監察御史民吉有曾孫繼
祖以太學生爲東平判官都御史有子勗

今天子親試擢入翰林監察御史之子彥謚予兄子婿也與
勗念其先自唐宋數百年來至千澗復脩明譜牒至今猶
可考證一門仕宦彬彬未艾而千澗之譜脩於至順癸酉
至今永樂戊子又七十六年矣於是將脩續之而請序於

予予謂中山之族不可知而金谿萬載清江纔數百里內
亦鮮有聞詩書之澤何獨厚於吉水富克與城南也歟凡
脩是譜者幸悠然而思之藍氏仕于宋元者多矣叅謀公
獨以忠義而衛國東平特以逸才而顯融諸賢子孫幸思
而繼之所以大有光於茲譜者豈不在於來今也歟

龍城毛氏族譜序

唐承元魏俗尚門第予鄉世家盛於唐至南唐李主又承
唐祚力慕復其制作求其故家如恐不及宋得江南服其
文推衣冠胤胄多所拔擢媼家龍城毛氏來自三衢有諱
讓者爲南唐大理評事至工部尚書其子諱休歸宋即授
銀青光祿大夫守國子祭酒兼殿中侍御史賜紫金魚袋
守吉州迎其父尚書公就養于官不幸拍館州民爭留其

喪因葬州之龍城卽而家焉其孝行有自来矣故世有孝子世有顯仕若毛孝子仁載于國史聞于天下當時若歐陽文忠公忠襄陳恭公一時鉅碩或稱其文或叙其行如出一口若世稱毛拔萃者則諱應佺仕至殿中丞仁宗賜之璽書榮赫昭顯所謂龍城兩拔萃者是也若世稱毛神童者則皇祐進士仕至中散大夫輕車都尉諱君卿是也先祖濮州公吉甫於神童爲子婿是以知其譜牒之詳有在三衢者若開禧狀元靖康忠臣紹興臺諫在廬陵者若至正臺諫內翰其在龍城或父子聯科或兄弟接武外而州郡牧伯內而侍從法曹史書郡乘班班可考豈尋常驟傑所能及其萬一哉神童之後其裔係省夫以孝友名家不忘其先拳拳於宗譜之傳請予記其源流以示其後之人也予以通家乃不辭而書此以弁之若孝子拔萃神童狀元有路人之口碑具存不待予言也

江氏族譜序

吉水江氏系出曹州濟陽唐末避亂徙居金陵又徙居新塗有諱濡者後唐爲饒州兵曹生元晏七歲應神童舉年十七登進士第爲國子博士南唐亡詔辟爲吉水縣簿因家焉生崇舉明經終尚書駕部員外郎累官刑部侍郎致仕子澤字宣臣蔭補將作監主簿調筠州新昌令僉書判官廳公事遷尚書比部員外郎國子博士出知道州生維申道州刺史中書舍人生愷爲太子中書舍人子集軒爲秘書校理秘教生蔓鄉蔓鄉生德琛元初仕爲桂林教授二子長東注次夢晁東注二子長逢春徙居大洲次逢周

仕爲大使居灞橋夢晁生三男季高季常季洪皆居故州
大德中季高長子允迪始居于東門予媀家子鄒祖輿售
其地允迪慷慨好義家富系千金喜賓客篤於教子當時
名儒若竹西蒼筤二劉先生季大父蒼霖解先生皆爲西
塾師與耕王先生輩皆出其門允迪所以延接四方賢士
極至子崇德舉明經仕爲召城龍泉學官有所藏宣城誥
命一通學士揭文安公提舉岳申劉公皆爲文稱述崇德
學行之懿而世家之慶不可誣也崇德令子伯昂元季與
陳友定舉兵于閩宣授叅知政事次仲溫少務爲學尤長
於詩號東湖詩隱嘗手抄其譜系與名賢詩歌文章爲二
卷授其子彥政彥庸謹藏之彥政令子孔殷又叅考諸族
之譜輯其大槩來 京師請予序孔殷擢進士入翰林會
病卒予不果爲今年歸鄉彥政令子維翰維禎三詢其族
人正其譌舛疏其分合之詳復以序爲請其用心實勤且
誠也予爲之歷序其傳叙俾江氏之子孫有所考而興起
且知其家世名儒而知斯文爲可重也

吉水寨里安成李氏南唐譜序

安成李氏系出南唐南唐書稱憲宗生建王恪恪生超超
生志志生榮榮生昇是爲烈祖生後主煜以子傑爲吉州
刺史開寶乙亥南唐亡與俱入汴至太宗太平興國三年
後主哀請遣一子歸守墳墓由是傑復歸安成安成之西
接湖南攸縣界有南唐興王之塚前列三十六陂人以爲
清道水者至今猶存也傑字邦特二子曰坦曰垓與永新
劉氏賀氏江氏世爲婚媀子孫蕃衍坦生四子其叔氏西

英西英生升道升道生誓誓生思誠思誠生仲祥仲祥生
通甫通甫生十郎某某生四七郎四七郎生四郎四郎生
小生郎生郎生六二郎二郎始居吉水生元一郎二子曰
天祚天祚距刺史君五十世矣天祥生原道原達原道生
宗白原達生宗輔宗昉宗白以永樂甲申擢進士爲翰林
庶吉士奉其父與叔父之書以此譜求京師名士大夫
爲之序余惟盛德之後徧於天下積累之功豈可誣哉雖
微顯不同要未有喞然而興者刺史君隱居不耀連世亦
未嘗顯予少時得見宗白太父祥雲豪邁喜賓客與先公
交友予又與原道往還宗白之擢進士也予知貢舉予謂
李氏其將復顯於茲乎而宗昉又駸駸務學其慶未可
也書于譜以俟

東門鄒氏族譜序

先九世祖宣教公學者稱文江先生有高第第子鄒君諱
俞字某宣和中舉神童紹興癸酉舉進士第仕至節度推
官因家予所居之東其先蓋汴人也至唐中葉有諱思道
者爲江殷刺史始家杭州世至瀾仕爲臨川刺史因家
宜黃瀾生瓚爲鎮南節度使瓚生筠後唐對潞國公遷樂安
之沔川筠生天緯爲荆南節度使天緯生輝望字望龍宋
初殿中侍御史侍御生琦琦生軾國學內舍生軾生師旦
師旦生守格守格生復邦爲澧州判官復邦生錫圭錫圭
生希哲爲太子正學俞之父也俞生恒恒生清叔爲先高
祖巽川之婿季布鳳叔仕至兵部侍御史有傳清叔生舜
咨舜咨生淵淵生天成天成生元忠元信元昌元昌子字

伯秦仲琛謀以家譜刻之徵予言予本其世系叙之如此
今仲琛徙居于邑南門締構軒豁稱其心懷視故居在墟
曲指顧之間故家之風度如昔也尚且務教子孫敦詩書
以與此譜俱永傳哉予亦與有榮焉

吉水許氏族譜序

許氏姜姓春秋許男之後以國爲氏漢末靖邵兄弟顯名
以汝南爲望族而其顯於唐者歐陽公所述宰相世系表
詳矣吉水許氏譜出於譙國公嗣宗其上世與表合後五
世有景先爲福州刺史家于福之石門爲石門許氏又六
世至諱濟者宋端拱初始以進士顯名再傳至諱將者元
祐中仕至禮部尚書謚文定始葬無爲軍而其諱某者政
和初徵之不起隱居于撫州臨川再傳而諱定之者以諱

熙六年通判袁州諱升之者以乾道九年爲吉水學官因
家于學宮之傍定之之卒也葬于袁州袁吉相去接境定
之子克依于叔父因家于吉水之城南是爲吉水之許氏
系兩派而皆出于徵仕君者也其遷徙由汝南而家福州
在唐末五季之初由福州而臨川在前宋之末由臨川而
吉水則南宋之初也譜繼自濟始闕其不可不知也予嘗
讀南昌地志云漢末之亂許靖奔江南卒于豫章令南門
五十里有石麟尚在即靖所葬處而晉旌陽令遜又爲之
表其子孫亦往往居江西者予嘗詢其宗族雖久遠疏戚
不同大抵多出於汝南蓋汝南之所積厚矣又嘗讀家乘
獲聞先君子筠澗先生餘論知許氏歷宋至元居于學宮
之傍者若升之子持已其孫文明皆博學儒者而澹然雲

心父子與先太父竹梧先生交游萬密太父之未出而仕也雲心禮為西塾師其家子弟與鄉之俊秀成孝者甚衆也其居于城南者若東厓暘谷山梧雲東雲間諸先生相繼而起而山梧於太父為同門日孜孜會稽山梧之子婿也於先君子與同門世家往來嘗親教誨元季之亂予家避水西山梧令子茂明相與扶持尤厚予自少時識今武孝訓導幼導攻文急義先君子嘗慨然指以示予稱道其世家之文采雲心有聞孫檢討南耕先生洪武中罷官來歸得侍周旋過從談論又見其脩續家譜而為之序又慨然以門衰祚薄子孫失孝為懼然予觀之吉水比於汝南誠為不薄矣今頽仰二十年間南耕與幼道皆卒而予皆為銘其墓南耕子鳴鶴出其家譜俾為之序且曰予非求

為誇大也所以卒先人之志也先人之志以為脩明此譜俾有易其所業者觀其名字之在列而與祖宗不相似未必無所愧而改也俾其學而未成者觀其先之所立未必不勉而用力以求其至也至于富貴則非所論但不失為士以無辱於茲譜者矣是則先人之所望於族人也鳴鶴之言如此而必稱先人其厚之意為何如哉予知吉水之族將與汝南抗而後之許氏又必以吉水為宗也

吉水山原羅氏族譜序

吉水山原羅氏出於襄陽襄陽羅氏隋唐為甲族春秋江漢列國有熊之後裔也予家譜載宋仁宗景昭元年甲戌王魯為相士類翕集放進士榜得張唐鄉以下三百餘人而吉水流坑一門五董世艷其榮予先族祖以童科賜出

身同年進士襄陽羅拯字時濟仕爲吉州推官而董氏與予家及古城曾奉先龍城毛偕皆以同年而敦契誼推官遂留家吉水之河口下浪鼓鳴岡是爲羅氏之初祖也生三男長日宣字三德師事太傅彭公齊公偉其才器以女妻之彭公世家白珽日宣由是居于白珽之完塘擢曆二年楊寬榜進士與蕭定基之子汝勵猶子汝霖永豐曾朝陽董淳之子搯皆同年而淳與推官公爲同年士論稱賞時相則臨川晏元獻公甚相愛重擢給事郎守秘書省著作郎知長沙縣通判邕州特勅守秘書承奉官生三男長撫辰出居于外次序辰嘉祐中舉進士皆居完塘其季拱辰字次緯生蚪字仲晦世有學行薦於教子是生斐恭字欽若以詩經學入汴京爲太學生高宗建炎初李易榜

仕至朝散大夫知武岡軍政事蔚有時望其沒也文節楊公狀其行忠簡胡公銘其墓世稱不欺先生有文集行於世始徙居螺陂之楓山生三子長齊賢以父蔭仕至瑞金縣簿次尚賢字子行以父蔭仕至從仕郎娶蕭氏周文忠公之甥也恩封孺人賜冠帔生如川周文忠公薦知黃陂縣始居螺陂之山原至今爲山原之始祖也一子曰幾生聖傳五子獻可復可與可廷可曰復元出爲族人後予少時聞先君子與建可父兄仕宦交游甚熟而螺陂逆塘之間蕭陽世家其地羅氏科第相望累有同年之好予嘗屢過山原復可之孫敬簡與一門群從周旋款曲放歌縱酒文節楊公族孫子恭爲西塾師每與出其所藏名書竒跡世續家譜井然甚明有若提刑蕭公深夫所爲序與其家

所自著皆不可污徒爲之擊節興嘆其何先世之多賢而後嗣之尤盛也詩書忠厚之積豈不長哉予今年歸自京師敬簡遣令子持家譜示予叅之舊聞若合符節因文考實悉數條篇雖然鄉衮之文章在是羅氏之先德在是其後賢之在是予也晚生末學何能爲之輕重歟若敬簡尊崇令先祖率勵族人用心亦廣矣夫

夏派劉氏族譜序

叔苾劉君以明經起家爲令長沙甚有惠政考滿來京師公鄉故人爭欲舉薦

聖天子親擢北京工部員外郎繼而所以知舉選入翰林與纂書史乃以其宗譜示予其先在唐末有仕爲武功大夫團練使者提兵領安成因家于固岡傳至諱儒者南唐保

大中徙廬陵之夏派其諱淵明者叔苾之四世祖諱表臣者叔苾之六世祖皆宋名進士分爲上下宅終宋及元仕者二十餘人入國朝伯述知山陽縣洋縣致仕叔苾之世父也伯迪處士博學能文性嗜隱遯七辭徵辟叔苾之父也孟苾爲岳陽丞叔苾之兄也詩書之積簪笏之傳照映先後叔苾以布衣再傳至通顯豈不有由然哉而叔苾高祖碧岩翁藏書萬卷尤萬意於宗譜脩輯明備不遺餘力曾祖芳洲公大夫楚山公當元季之亂保藏於傾覆流離之際無所遺缺伯述伯迪以親之所愛惜也手書一編以遺叔苾游宦所至携以自隨其所以拳拳於是者豈不出於常情萬萬也嗟夫杞宋之文獻聖人爲之痛惜魯之分器不守春秋深致其譏然則世家宗廟之祀墳墓之守

譜牒之存三者有失不得爲人子孫之賢矣若叔慈之祖
孫父子真聖人之徒歟真足以爲世家之儀歟

東門李氏族譜重序

譜之作者辨親疏驗次序別同異世之孫子而能念其初
者則譜也予媿兄李綸字士鼎請予叙以譜求記因稽始
祖李斌字三益仕宋朝爲散騎都尉奉命南行由金
陵至吉水見山川之秀麗遂家於東門故子孫之繁且相
繼登宦而非他姓可擬今東門之派其來也有自其譜也
有徵况盤谷畜序南樓詩歌予已詳之矣何必贅乎今後
人士鼎能繼述于茲予筠澗先生與士鼎祖父媿契往來
輒出是譜予表兄劉君子璋作序今河南大叅歐陽以恭
所書皆名公鉅筆特爲士鼎相承脩其譜亦義之不容辭
也故僭筆書其槩庶幾爲李氏子孫之徵

吉水余氏族譜序

始興余忠襄公十二世孫學夔奉其父之命以家譜求予
之序按忠襄公以慶曆五年報使契丹坐習虜語出知吉
州緣家因之中以事左遷將作大監還鄉里闔門絕人事
凡六年吾吉與始興相通也于世而昌陳氏有公儉與公
厚善故其子仲荀爲婿陳氏因買腴田數百頃遂子孫計
遂有後于吉世業儒素九世而至友梅當宋亡元興深衣
大帶不爲夷習爲鄉之宗儒學夔之曾祖也夫以忠襄之
仁賢其有後固宜又得友梅諸君爲之繼而皆未食其報
也學夔之宗族繼自今其盛豈可涯哉學夔登未樂甲申
進士第在二十八人之列學于禁林忠襄公之業其載顯

於是歟且曲江數百年來相望而起有唐相張公與余公
二人而已皆有後于吉豈非知古多君子而士風之可依
故歟二公之見又何其相似也歟孔子曰里仁爲美擇不
處仁焉得知若二公者其不謂之知可乎宜其非他族之
可及也余之子孫其善繼之哉與張抗盛爲曲江之光重
以爲吉人之勸焉

吉水龐氏族譜序

永樂四年八月吉水龐君文遠與其族人某纂脩其家譜
若干卷其猶子明叙以能書選入翰林求爲之序予方嘆
之吉人士多世家而能脩續其譜者十無一二但恃其舊
譜誇示於人而新譜謾不加省指其本宗以自誇於已
而族人謾不知怪也亦何貴乎今文遠此譜自七世之上

以元季之亂燬于兵定其可知者亦世祖叔達朔置祀田
百畝歲時斂所入以祀其先而族固以大叔達有子五人
季安季容季雲季遠季文皆讀書應進士舉增置祀田又
二百四十畝宋季從信國文公舉義兵其家貧不恤也四
祖良甫又增置祀田合前後爲五百六十畝課耕桑者二
百六十餘戶以供祀事之役其盛蓋可想見幾五十年於
此矣又憶先君子當元盛時與文遠之兄文昭同游北京
最相親厚及予長而見選翁先生與其子孫一門群從竊
嘆其家相與如此

堤平張氏族譜序

予讀唐書知慕曲江張文獻公直道先幾遭讒不用恨不
生其時見其像容而抱其下風也往年上庾闕見所題字

仰手植松晉拜祠下自以為晚生幸遇去年歸自南交過
韶州觀風度樓遺址謁古祠下有唐徐浩所書神道碑銘
像以鐵鑄故久不壞其墓去城十里而近然今城非故城
故城在武水南今有佛寺其退休時所居也又過平圃驛
云公之別墅公之主實在今南雄始興縣初屬韶州後割
以置南雄以此人但知求公故宅於韶城而不知今之韶
城非唐之故城但知始興為韶屬縣而不知今之隸於南
雄也又其祖墓近韶城者山頂有石山巋然人號為貂蟬
峯者亦可見人之艷慕公者如此也然歷訪其子孫無在
者云多然徙他郡余益信吾鄉張氏譜出於文獻公者不
誣也公之上世事其唐書宰相世系表但其傳嚴以為青
陽之子揮為守正賜姓者蓋妄說而宣王時張仲益人之

字而亦非氏其為出於晉大夫解張號曰張僕之後則可
信不疑也吉水外固堤平近族相望指顧之間譜自文獻
公玄孫景仲宋初咸平中為吉州太守始其諱敦慶仕為
袁州司空叅軍太守之父也其諱葳器長水縣丞太守之
祖也其諱拯仕為贊善大夫者太守之曾祖而文獻公之
子也予考之與碑銘表皆合太守二子煇為歸善令燿為
樂昌令煇生亭傑有子五人弘淵之後居蕪湖弘深為廬
陵令其後居恩江鎮即今永豐縣石井銀山沙溪唵田皆
其分派也弘澤為崇仁令居樂安南村弘淵為虔州僉判
其後居恩江杏源弘海為崇仁主簿其後居恩江遷蟾塘
宋季梧守唐輔自序如此而謂自景仲居廬陵亭傑為盛
亭傑五子弘深之後為尤盛今觀外固堤平譜益信然矣

弘深子瑤居于唵田世以詩書科第顯嘗三爲解元而入
太學至咸淳己卯夢龍雷龍兄弟聯魁夢龍官至司業雷
龍仕爲編脩瑤之後十三世至平叔有子五人廷簡廷傑
廷玉廷茂廷臣廷臣外固之初祖也廷臣五子季蒙季開
季迪季允季允頡頡文儒鄉稱其里曰興儒里季允二子
伯恭伯脩二難競秀而伯脩又堤平之祖也青山趙先生
稱其魁偉崑岸識度過人機畧尤深言行必依於厚嘗拔
人死地以爲當然其子無改於父鄉稱景良如伯脩其孫
無忝乃祖鄉稱先傳如景良先傳之卒也申齋劉先生銘
其墓予又讀劉文敏諸公所爲秋景亭詩文與先季太父
蒼霖往來其師弟子間書札國初諸老先生所爲尚質傾
家舉義兵事嘗竊自嘆若先傳父子非可謂之太過之文

獻公歟尚質令子國賓之卒也予嘗爲之銘其墓嘗欲一
訪舊堤平外固之間往來于懷也伯脩伯恭二難之後今
又將九世後彥相承金玉輝映脩明後譜與族人競勸爲
忠爲孝立功立言文獻公之復始予有望焉予欲廬陵之
望重於曲江也

烏江陳氏族譜序

世臣巨室自先王之世已重之旣以立德行之先正風俗
之本以爲民望也廬陵自宋以來尤以世家相高仕雖顯
非世家不以爲榮也文雖工非世家不以爲重也惟德行
可尊則世家始愛而敬之以勗其子弟此又世家之旣以
獎掖寒族也皆庶幾有先王之遺風焉烏江陳司戶家宋
元之際富貴赫奕烏江又吾邑佳山處也園林亭館之清

華衣冠文物之郡聚通儒游客之揄揚亦一世之盛哉而
皆詩書之澤也其先陳之宗室爲江州義門再徙永豐穫
龍司戶之先九府君始自穫龍居于烏江至夢材官至朝
奉大夫安撫湖南知柳州至諱琪者嘉定癸未進士先六
世祖江華公姊婿也至咸淳戊辰日升復登進士第爲江
州司戶琪初仕亦爲司戶信州時稱陳司戶家以此也司
戶官非崇顯特爲人所慕尚如此非以其出於世家素爲
時望故歟凡今之爲子孫者其可不務德行而益行其詩
書之澤歟予忝世戚茲方凜然以不辱其先爲勉者伯珪
伯琮以家譜介凝節劉司訓走京師求予序予姑致此
意而歸之伯珪兄弟去司戶幾世矣

泰和王氏族譜序

琅琊王氏自晉太傅導佐元帝中興存中華文物於江左
三百餘年有功於世道甚大故郭璞嘗爲筮之曰淮水絕
王氏滅淮水豈有絕哉太傅後家金陵者久而彌盛有譜
牒南唐世擢王公崇文爲吉州刺史金陵之世家也其從
孫贄字至之從之官因家于吉之泰和天禧初擢進士第
有文武才深見知於仁宗英宗初以禮部侍郎致仕官其
後世判吉州以便養厥後世不失爲士淳熙中有諱化
及開禧中有諱圭者皆以進士得官其登名太學者比比
有之元盛時有諱以道字臣則者因張伯剛李道復遇仁
宗于汴固邀從入京固辭曰受父母命遊汴而已歸而弟
子彌衆竟以隱終於乎此其人非抱高世之節安能若是
耶太傅公之遺澤未艾也其子子與博學尤以詩名今行

于世

太祖高皇帝聘與講書擢爲福建監運副使辭不拜其季曰
子啓仕爲監察御史遷廣西按察司僉事知崇慶州歸老
于家子與有子伯貞繼爲廣東僉事今歷官至中順大夫
知瓊州府以子直官翰林脩撰蒙 特恩卽致其仕其榮
盛爲何如哉又何其與先祖遭逢相似耶直字行儉間持
其家譜示予求 之序既疏其事如上而又必推太傅之
世家明積善之不可誣也予居鄉時嘗登青原山得侍郎
公之塚又下墨潭山至中邨得通判墓碑有讀之爲之三
復而嘆與太史公登箕山之感無異其譜所傳豈不信有
徵哉矧先公與子與君爲莫逆而子啓君之出而仕也與
先叔父同年幼時嘗及拜謁而不能知其詳惟瓊州公念
先君子之交契忘年相友雖班荆逆旅傾竭議論退而思
其風度凝遠中懷曠如久處而不厭往來思之而不能已
非真可謂老成薦厚之君子歟行儉亦甚似公而謹飭侍
郎公父子之名位事業皆有繼也如是足以爲此譜之光
華使後之人有所憑藉扶持而世守之也

泰和楊氏族譜序

予嘗讀先賢楊文節公自序其譜稱古書傳楊姓皆從木
或者見子雲傳偶闕其點遂以子雲爲抑揚之揚非也德
祖荅子建書云脩家子雲老不曉事則雄與脩初非異姓
也由是知允謂楊有二族且以楊氏爲出於晉大夫解楊
之後者其皆不足信也序又稱本朝歐陽文公誌大雅墓
曰九世祖隱朝生燕客燕客生堪堪生承休而唐書世系

表則曰朝生燕客燕客生寧寧生虞鄉虞鄉生堪何其自
相異也及攷之宋文景公作虞鄉傳虞鄉父曰寧子曰堪
廼與表合蓋誌誤也今按歐陽公作在表之先意者其時
未有所攷或據楊氏家傳書之耳由是知家傳承訛類有
可疑者不特此也大雅自叙其譜云震之後生承休在蜀
從昭宗以子巖從浙真宗時以家譜授職方公職方公復
以授侃真宗時巖固尚在也而文節序稱巖曾孫輅仕江
南爲虞部侍郎按唐守官誌無此官或者偏方創爲名不
然則傳者之誤也今攷之九江蕭氏譜其曰霽者在吳乾
貞初以策干僞主得仕爲武寧長官乾貞之敕尚在鄉先
生題識皆云霽長沙人其舅於輅守吉州因家廬陵則輅
之守吉實在唐末楊氏吳之初年而虞部侍郎者蓋僞吳
官號耳以時勢考之巖在唐末時尚當少而豈有曾孫已
仕刺史耶予嘗意其必兄弟而皆承休之子耳而文節公
所序廼如此何也讀王荆公所爲蕭世基神道碑銘亦以
乾貞爲南唐李氏紀年較然謬誤抑又何耶然楊氏旣多
所至迭盛予嘗觀其閭鄉譜大同譜四院譜龍齋譜靖共
兩院譜蜀中院譜渡江院譜浙院譜浦城譜吉水楊莊譜
上徑譜並塘譜小南江譜今翰林楊公士奇所輯泰和譜
何其所隨寓而盛也龍齋已上不待言矣其曰靖共者長
安坊名其在唐元和長慶一院不下數百口族長堂前有
水榭朝退問安擲笏其上堆積明且亂取以去俸錢所入
至逾百萬祿仕之盛古未有也唐季之亂播遷東西浙院
之盛相吳越王六十年與錢氏相終始吉水楊莊並塘自

侍郎長子銳次子鋌始遷文節序稱二族人國朝以來至
于今第進士者十有三人楊莊居其九曰丕曰純師曰安
平曰求曰同曰邦又曰邁曰炎正曰慶信澁塘居其四曰
存曰杞曰輔世曰萬里楊氏自太尉以來大抵以忠孝文
學相承而近世卓然冠吾族者忠襄公也公之死節有傳
矣而十三人者之中公父子及一孫一家而四人焉忠襄
公即邦又而萬里之爲文節公也觀其自叙蓋亦以爲楊
莊澁塘之極盛也浦城譜亦出自澁塘而至文公大年始
盛及元延祐中公十世孫楊載仲弘又以詩名顯亦以光
於澁塘也今泰和之譜自銳之孫延安從上徑其孫允素
始居泰和又六世而至德明德寬兄弟積善于前是以德
寬五傳而有賢可是爲延祐進士與仲弘同年後歷官翰

林待制致仕元史有傳爲泰和楊氏顯盛率先世自是而
西府君之子孫第進士與明經入仕者并侍郎公亦既十
有三人矣德寬君之後居其十二舉進士者曰賢可曰升
雲曰起予曰自立曰相有官者曰公望公安公榮仲升曰
子肅曰逸民與士奇也德明君之後居其一曰守吾也而
公一子魯孫玄孫五世七人相繼益顯又何其與忠襄文
節之合轍而同符也歟豈非其本同歟天之報善人不爽
錙銖固如是歟今士奇以舊譜刻於延真觀者不存而據
舊之失其節續者列置後卷予考之世次華甫至定甫雖
失其上三世然皆德明君之玄孫於譜爲第十世惠可以
下爲第十六世也元可至達觀雖失其上四世然皆德寬
君之五世孫於譜爲十六世孫但以某字補其闕而上

有德寬德明二府君以爲之宗下有惠可升雲著其緒引而申之雖百世而譜之昭穆尊卑序而秩之又何嫌於有所闕而釐之於他卷歟予請合而著之他日延真之譜復出不易吾言也

恭和歐陽氏族譜序

歐陽氏書神禹之後顯於漢晉孟唐而率更公父子名位赫奕再傳而微乃有後于告至今不衰甚與予家相似也漢世予家受詩而歐陽氏治尚書至晉同預趙王倫之禍至唐初予家以武功顯而歐陽氏爲相至唐中葉予家爲吉州刺史而歐陽氏繼來吉州刺史因有後予吉歐陽刺史之繫黃巢也先祖朝議公又實與之戮力今其戰處故老猶能知之科名宦譜先後相望兩家世契甚不偶然也

又非他姓之可比也洪武丁卯予與歐陽允堅同自舉于鄉又明年其弟允賢復薦春官得嚴之教授以歸往過之其族祖三峯先生出示家譜著自刺史八世後生工部尚書工部之七世孫仕後周爲太尉家于吉之萬安宋太祖建國時太尉已薨太祖念布衣舊交追封爲梁國公後七世諱德祖者自萬安居泰和蜀江德祖之兄諱毅事宋高祖護軍參劉琦韓世忠之軍屢破金虜爲秦檜所疾困於常調其所受誥敕具在予先祖太原武襄王少隸韓世忠軍考其歲月又當時共事者也予既與允賢各自嘆息相勉爲紹述顯揚遂淹留蜀江者旬月別去十五年爲永樂癸未允賢入爲國子助教朝夕相見明年予知貢舉得三峯之孫俊而奏之擢甲科入翰林與纂脩允賢以三峯之

書與舊譜一編來求予序予謂鄉之氏族唐宋稍廢賴歐陽氏中興之其可為法於天下傳於後世者豈待予之贊美耶譜自刺史公以下皆文忠公所著尚書以下有監丞公所述與鄉之先賢周文忠公楊文節公胡忠簡公及蕭文林吳西林晏桂山朱古平文詞具在予無以加於其言者故叙其世契如此是亦重相勉之意蜀江之譜與瀧江之譜相照映無疑允賢之居蜀江纔八世云

廬陵城西劉氏族譜序

予讀宋丞相益國周文公所為劉長者墓碑銘稱其富累千金子孫皆賢由其篤厚行誼所至未嘗不為太息曰孝者必有後不孝無後無後者非天絕之也自絕于天也益公之言非至當歟今觀孝章所示宗譜乃知長者之裔孫

至今長幼數千百人富而知禮好學而能賢謂非盛所至不可也長者出自安成太守遐遐生賄賄生禋世家安成其後有諱景弘者徙家永新有陰德于吉郡事見唐史景弘二子長曰煦家吉水之夏璜煦子庚徙家廬陵城西之上邳仕南唐為金紫光祿大夫入宋以來多有仕者至長者而家益饒時稱萬石長者之後曰宋宣義郎生次生二子曰元方敬方元方生敦復敦德敦復仕

天朝為桂林知府陞廣東叅政以卒號西愚二子曰敦信敦善敦信初從敦復游宦博文隱德晚起為吉安學官孝章之父也永樂三年知山東貢舉過京師授其譜孝章求予為之序焉嗟夫人之所以異於物者知有人倫宗族知親疎之等而追念其先之所自出也奈何世教既衰譜牒

失官姓氏無別其誕者借華胄以自冒是猶有好德之心而不知義而不是可憐而不足責也若其不念祖宗至有祖諱妣氏皆聞知見人有用意於譜牒輒以務名譏之稱述先德者輒以冒昧疑之嗚呼自不能念其親又禁他人使不得念其親獨何心也哉求如劉長者之有後如孝章父子宗族拳拳焉於尊祖敬宗者難矣哉

廬陵官草彭氏重脩族譜序

元季之亂先君子筠澗先生以正至甲武招諭江西至吉安時文水東盡爲賊所據家燬于兵往來依止水西廬陵官草路當要衝義士彭君寶林與先君尤厚善故以女妻其子寶林慷慨雄傑初以鄉兵破走蕪寇復吉安城功第一授水軍萬戶歲壬寅天兵南來即知事不可爲取所

授虎符北面再拜焚之號痛欲盡念其父九十餘內顧未忍絕而復甦遂杜門不出子志道代領其衆因內附從常遇春下贛與朱文正守江西有功不言賞亦自勉歸寶林竟先其父卒先君子爲哭之哀言其父源源翁平生勤儉貨殖累千金布衣糲食不妄費一錢及遇亂勤王寶林將兵在外翁調饋餉給賜與日費千金未嘗吝惜予皆不及見之矣見其畫像生氣猶凜然也及登其所居齊壽之樓雖兵燹僅存鐘鼓在虛樓前古木數章枝柯切雲下臨清池遠山如畫想其意氣之雄凱旋飲至徒屬賓客之會於茲也可謂一世之盛哉而志道兄弟尤豪爽好客輕財重義綽有父風嘗盛服馳駿馬射鵬繫劍劃然長嘯疑古河朔間俠士然晁睦於宗族皆誦其家譜如流水謂予序之

不果爲後其族弟志昭與予即其始祖鈴轄公所居遺址
在官草路西之塘南地勢寬廣規制充壯予爲徘徊久之
志昭復出家譜示予謂其少孤貧無依賴寶林父子鞠育
教誨以至成立寶林沒時以家譜爲囑先兄志道不幸即
世志昭又多病恐一旦溘先朝露日就隱昧子孫無聞知
盍爲之序以傳予甚感其言而亦以事不果爲未幾志昭
亦卒今未樂甲申志道之子雲路以隨 龍功擢錦衣衛
百戶其弟雲龍就省之以其家譜來路遂補其父而下者
十世并述其父及諸父事著爲小傳而序其端且曰吾父
之意也於是志道沒十有五年矣按譜自漢司空長平侯
宣世家淮陽九世至樂北齊留王孫景直事唐爲禮部侍
郎居袁州宜春生茲爲進賢令予偶爲宜春令始居廬陵

之隱原子輔爲信州長史五子散居于吉水未豐之間其
諱玕者是爲吉州刺史其後益大玕十一子其諱彥昭者
爲靖江節度使年百餘歲薨于未豐沙溪之第彥昭十五
子其諱師爽者生德順字子昂南唐附馬都尉始復居隱
原有儀衛五百餘家大興第宅官爲陶甓於未和貴振江
鄉五子皆賢曰吉壽堯嘉堯仕至大理評事生程字萬
里贈諫議大夫萬里生應求號南國詩人仕至太子中允
贈金紫光祿大夫應求生思未仕至御史中丞戶部侍郎
賜第和州因葬歷陽焉程伯子其婿也史有傳夫人晏氏
丞相殊之兄二子曰衛曰衍皆徙家歷陽衛之子曰謏始
自歷陽來歸因獵于官草之塘南犬逸入藜薄中不見夜
伺之肴有祥光起焉明日遂芟其藜薄治第居之是爲鈴

解春百先集 卷之五 王四
轄公自湖南解官草塘彭氏之初祖也六世至諱端者見
所居東面周坑有孚惠神廟當大路一夕大風雨廟屋神
主皆拔去他所端兄弟素饒財喜營屋室以爲天授即徙
居之是爲寶林之父也由是而家益饒嗟夫彭氏自唐歷
五季宋元至于今數百年代有顯者譜牒明信是大有於
庸衆人者子孫豈可以庸衆人自棄哉雲之祖父所以重
慎譜牒之意在於持守其身不辱其祖宗非徒以誇示而
已也

廬陵朱氏族譜序

中華士大夫以閎閎相高衣冠相尚號其族於江鄉非江
鄉不齒士類其來尚矣洪惟大明開基我太祖高皇帝繼天立極納天下于皇極之歸

列聖繼統漸摩仁義涵濡教養垂萬年之統緒囿海宇以禮
樂雍熙之盛乃治隆虞周也何其盛哉廬陵爲四忠一節
之邦江右鄒魯吉水又爲廬陵縣渡江而西有鄉曰同水
故家喬木蔚乎雲連而朱氏世居焉惟朱氏出自高陽無
遠稽古第以唐末以來有曰絢者戍守徽州婺源迨宋文
公晦菴先生始太顯于天下晦菴生塾字受之受之生欽
字弘敬任宜春丞由武功績至武德大夫廬陵叅佐時愛
廬陵嘉山水始定居于城外上巷按欽子三人曰執圭秉
圭元圭執圭號可齋任泗州通判因家於彼秉圭號省齋
居于清塘其子椿任重慶太守政聲籍甚由秉圭而下其
世次行字顯隱徙歷葬厝之詳具載于清塘宗譜元圭號
德齋徙于北鄉莪田後分爲上下族至四世孫德全又分

吉水谷平德全生榮叔榮軒榮叔之子伯謙居谷平廟前
榮軒之子季可分爲上側阜由德全而下其世次行字顯
隱徙歷葬厝之詳其載于谷平宗譜於乎昔者宣聖能言
夏殷之禮而嘆夫杞宋文獻不足徵也夫文者典籍之謂
也獻之爲言賢也家國雖殊文獻則一然則江鄉之典籍
莫尚於族譜故江鄉之獻賢莫嘉於孝友之嗣子以孝友
之嗣子世其家必能寶家乘而藏之得其真輯家乘而脩
之慎其族戲得其真則如孔壁之書出而行之可信傳於
永世脩慎其族則若鄧林之木一本萬葉不至冒附於他
枝文獻之足徵不至在先世歟抑韓昌黎有言莫爲於前
雖美而不彰莫爲於後雖盛而不傳今朱氏之義且盛者
彰於前而盛於後不啻若足矣雖然學貴脩省德忌滿假

子不見水與木乎本碩而末茂矣又從而栽培之不旣益
碩且茂而聳壑昂霄梁其具乎源源而流長矣又從而濬
滌之不旣益深且長而源泉混混朝宗于海乎夫如是則
江鄉之盛美彌遠而彌芳矣噫此寶斯譜者文獻之足徵
也此觀斯譜者孝子之心油然而生也詩云毋念爾祖聿
修厥德詩云子子孫孫勿替引之書此爲朱氏子孫勉

永豐湖西羅氏族譜序

少時讀丞相信國公祭羅水心先生文及羅滄洲吊胥濤
賦未嘗不爲之低回歎息而至爲之出涕也已而復爲之
羨慕夫人誰不死而不泯使人讀文章想其節操恨不與
之同時而惟欲考求其鄉里世家其人狀貌長短肥瘠備
陋與子孫盛衰如念其親戚則亦可以無憾矣永樂元年

解春百先生文集 卷之五
獲與羅君師程同史館間以族譜託爲之序予少從事譜牒之學又感二先生之節義不敢辭按五季之亂羅氏兄弟三人自豫章徙吉其居廬陵仲氏從邊後世無傳季氏諱寅爲永豐湖西始祖至師程七十年矣其初譜牒每派各爲字號以相識別詳其本枝而親疎不渝明其昭穆而尊卑不紊總裔之下既以名行字號生沒葬娶八字爲則書其梗槩又於各派之首別爲小裔以所出爲小傳備書其事其立法既美矣而族屬既繁不能無盛衰之異遷徙不一其處會合不一其時因循歲月譜牒有不得而盡詳也於實宿之十六世孫曰玄字用賓者取賓之九世孫諱才智字聖鄉者有五男子皆字曰德於用得爲近屬也遂德五德譜如初譜焉今可見知爲明甚其曰德清諱性者

三子長俊季深甫宋寧宗之世再舉鄉貢深甫生上衡寶祐丙辰進士鄱陽尉江西提刑知南昌縣嚴諱忱淳熙進士道州江華尉江西運幹通直郎致仕於先高叔祖寶章公龍翔爲交代官德誠諱恂四子沆字文甫嘉定庚午漕貢進士郴州尉知郴州洛容縣文甫生士賓理宗之世再舉鄉貢用理字正甫是爲水心先生景定甲申舉于大學於先高祖夢斗爲同年咸淳庚午釋褐教授袁州德祐丙子永豐勤王兵敗被執不屈死吉州獄信國文公制服哭之宋史有傳時年已八十矣詠字衡甫理宗時直國子諫字仁甫淳熙辛酉進士莆田丞正甫三子安世字士嵩景定間京學教諭安行字士華理宗時兩舉于漕司衡甫四子希正字士克寶祐乙卯舉于漕司希晏字士門淳祐癸

卯舉神童以軍功授判福建同元以舊官強之不起希楊
字士鼎晚號松野先生淳祐癸卯與兄希晏無舉神童時
人榮之及再舉漕司皆第一儀狀明秀爽朗翁舟山一見
以爲天下奇才欲妻之以愛女以母喪辭之趙菊山又欲
以爲婿知其母喪未葬難於發言因問其故哀戚不勝遂
不敢言每與巽齋歐陽公須溪劉大博講明道學造詣高
遠至今故老尤能言之其曰德寬諱昭先四子貢字叔伯
四舉于鄉淳祐辛丑擢進士爲新淦縣簿應慶字春伯紹
定戊子鄉貢開慶己未特奏名授泉州清湘尉登崇字良
伯三舉于鄉淳祐辛丑與兄叔伯登第時人以爲榮仕爲
英德推官以卒齊賢字敬伯嘉熙庚子初舉進士二兄已
三舉四舉偕赴春官同年戲之曰雖弟兄尚須後舉既而

擢甲科遂以鳳目之叔伯一子淮字士寧嘉熙丁酉舉于
鄉第一春伯一子文起字士永咸淳丁卯舉于漕司良六
子長虞鳳字士龍咸淳丁卯舉于鄉第三子惠儒字士迪
理宗時兩舉于鄉咸淳戊辰登第爲武昌節度推官荆湖
制幹元初徵爲江陵總管不就其曰惠恭者諱恪聖第五
子也三男康甫享甫達諱驥龍寶祐乙卯舉于漕司享甫
三男曰斗元字士中其仲子也咸淳庚午漕試第一因徙
事湖廣漕司此五德譜彰然甚明者於予所聞若合符節
也今師程續而脩之者又非特爲羅氏子勸庶以爲天下
勸也蓋水心先生之子京學教諭士嵩生三男曰公寶字
鎮翁叔字時翁公舉字十翁時翁即滄洲水心之孫也咸
淳之末年以軍功尉永豐與諸父士迪當元之初上書乞

存趙孤以奉宗祀棄家至汴與宗室趙孟深再議興復有志無成慷慨英偉讀其文章猶可想見而師程所以拳拳於家譜者恐其失而可惜也按譜系水心於師程爲之父滄洲爲曾叔祖庠直諱槐孫其曾祖也曰宗祐字建德其祖也其父同號鈞隱字伯與連世續學有隱德師程兄弟二人師程自史館爲國子學官醇厚有文章與人交久而益善其弟魯從伯善何先生習詩洪武庚申以賢良舉溧水縣遇既歸皆無愧其家者也師程所以續譜於古法所變更有舊序者有宋丞相信國文公丞相廷鸞馬公孟深趙先生齋曾先生爲於巽齋劉湏溪劉中齋吳草廬虞邵菴皆存之篇端有不待予之贊揚者也

永豐水東羅氏族譜序

豫章西山羅氏其系緒最久墳墓遶村可指而數也至二十七世有諱儀真者唐末舉進士歷官鹽鐵使於宋太祖建隆元年始居于吉州之吉水永豐鄉藤田水東醴泉院後至中和析永豐爲縣子孫爲永豐人其在龍泉之灘頭明德鄉之高橋寧都之鹿原大布瑤永豐之嚴原金龍岡近水東之平田吉州之梅林渡明德鄉之上坪旱龍亂石巖築塔岡山下水東下羅傍田圳口三角丘皆其族也母慮數千百人自昔至今詩禮相承或仕或隱何其盛哉其始居水東也建慈先寺其後當雍熙中宗族尤盛鑄景陽于醴泉幾四百年尤可考見非臆說也綿延若是而且崇顯其後必宏今鹽鐵二十二世孫文俊率其族人脩明此譜生卒歲時婚媾族屬如指諸掌墳墓遶村文若西山之

可指而數也則今雖富貴者安能及哉抑豈其所居之地
信得其所而風氣綿密有以爲之助歟其散而居四方者
又無不盛大文俊俾來求予序者梅林之四十世係伯初
伯初去監鐵二十有三世矣則又不係其地而係其先之
積慶爲足徵歟

永新逢橋左氏重脩族譜序

先七世祖評事公敬之禾川劉丞相冲之孫女婚也由是
禾川宦族多與予家往來交友逢橋左氏其一也有諱詢
者舉進士爲國子四門助教於丞相爲妹婿其諱戡者奏
補郴州郴縣簿丞相之女夫其諱顏者宋天聖丁卯王堯
臣榜進士殿中侍御史諱書言者元豐壬戌黃裳榜進士
朝散大夫諱友德者建炎戊申李易榜進士朝散大夫

部郎中其諱師召者與猶子夢高同登嘉定己卯蔣重珍
榜進士第其諱譽者開禧己丑毛自知榜進士仕知黃州
以朝奉大夫直寶文閣守本官致仕其弟擢賢慶壬辰徐
元杰榜進士爲景陵尉一門死義廟食岳陽朝廷嘉之賜
謚忠閔其他舉進士及弟爲顯官相望後先終元至本
朝仕者不絕予先世或仕與之同年官與之交代學與之
同業文字與之相酢荅至於父子兄弟聯魁接武又事與
之尤相類也考其先世有諱鄴者字富書潤之卅陽人鎮
江丹陽也南唐保大中避亂來禾川見地名有左坊而山
水又奇勝因定居焉傳十世至諱利見者春秋學有名宋
淳熙丙午江西舉進士第一嘉定戊辰鄭自誠榜登第終
迪功郎潭州攸縣尉而宋將亡矣乃叙其族譜欲鑱之石

事未就至十二世孫敬又重脩之而毀之梓實宋咸淳丙辰至元庚戌有諱寅孫者一名敬自華容教諭歷官承事郎監萍鄉州務本其父事之意而復脩之始列其仕者爲衣冠面於首篇以顯其先而勸來者文將爲亭於始祖之墓而扁之曰一初買田以供祀事而歲時會其族人竟未克如其志後三十八年爲至正丁亥其子善誅兄弟告其族兄昇謁文於一時名卿士大夫而鄉先生申齋劉公麟洲龍公皆爲之序刻梓以傳而屠其從兄英祖卒其族人出田構屋卒其先志又六十年於此矣十七世孫彥冲達兄弟復取其舊譜重脩之不遠千里來京師求予序予感世契之重信舊聞之審聽彥冲之言又知其今徙居安成去禾川爲甚邇不曰安成譜而曰逢橋譜其不忘始祖

之意爲有在而譜之脩續固可嘉尚若祀田亭構又必以次脩舉若詩書之習尤必以時勗勵敦睦之意忠厚之傳禮義之厚尤必致勉而此譜所恃以爲存亡者也彥冲初不識予族予庭萱以書未且致其意予是以序而爲彥冲不惟以告其族之人於庭萱亦以是語之庭萱自予吉水遷故城自教城遷安成與彥冲事尤相類也故宜各勉焉亦通宗相傳之義也

永新厚田周氏族譜序

永新厚田周氏本於勝鄉勝鄉本於吉水泥田泥田本於袁之分宜分宜本於廬陵烏東上下千餘年不出一郡之間隨寓而盛亦可羨哉烏東族自公瑾子胤封都鄉侯後徙烏東而卒葬焉至隋大業中有諱汾翁者仕爲會稽刺

史家于分宜唐長慶中有以經李徙于吉水之泥田泥田
葉氏婚畜之夫婦後後皆得異人指示葬處云子孫繁衍
文儒祿仕者相望至宋尤盛靖康之亂有諱平一字正寬
者避地求新之勝鄉紹興庚午歲與周文忠公楊文節公
同舉于鄉淳熙己未特奏名授迪功郎奉岳祠事親以孝
聞晚號槐堂子諱光孫諱仁魯孫以下皆以科第顯其諱
士斐者仕為郴州司戶居于鵠湖子諱思誠始居于厚田
生正臣正臣五子其諱忠言者為真州司戶叅軍至今又
將十世矣而子孫不失為士連因顏賀左氏皆求新之世
族忠厚相頡頏其益遠而有耀可期也族譜中經喪亂頗
有放軼真州六世孫孟恕兄弟叅考旁求証之郡志各於
譜畚間以質之於予予嘗忝從事於氏族之孝鄉之世族
序次待適且泥田於予家世有連也不辭而為之序云厚
田之子孫世當寶而續之

寶應金氏族譜序

洪武三十一年冬予以非辜竄斥隴右寶應金氏子諱得
為千戶河州與相往來知予嘗孝於氏族之書也與弟義
輯近譜一卷求予序予受讀之著其父之行事為詳其父
諱興事

太祖高皇帝和陽繼從渡江累著功效後從征雲南千戶河
州未幾以其習知南中復往治其叛者遂卒於軍得嚴其
父職兄弟和睦為時所稱尤喜從先生長者請問所益於
是執其近譜以泣曰先人嘗謂得兄弟曰吾家世衣冠文
物登顯仕非庸碌者所可痛者中經亂離舊譜亡失然其

解春甫先生文集 卷之五
遷徙流源尚能記憶爾其筆之書以示後世得兄弟時尚
幼文字非深曉故但記之初金世家蘇州范文正公之里
人也祖考自元初為隄安路寶應縣卒于官興之父因家
於上坊里生三男孟季皆早逝興其仲也梗槩如此不能
道其詳先人嘗欲與得兄弟自寶應歸姑蘇訪宗族上丘
隴不自意入南中竟殞不返得兄弟抱恨無窮將何以卒
我先人之志乎予亦方抱終天之痛聞得兄弟言大戚遂
不能為序今年義來 京師叢得官而得亦以去年五月
死矣是重可感也義因復出此譜求識其說是亦可示於
其子孫為無窮之恩矣夫

五鎮倪氏衍慶族譜序

婺源縣城東南五鎮前市倪君世安所卜居也作寢奉祠

脩明譜牒以示後之人令子以季舉進士來謁諸名公能
文辭為之序人無間言真實記也蓋曰自得姓受氏來數
千百年有遠有近有疏有戚有富貴貧賤之殊矣其遠者
在野畧近者在所詳雖富貴而疏者不援雖貧賤而親者
必收惟以別親疏惟以叙恩義惟以明源流茲惟休哉故
著自赤丘岡始在宋理宗時有大十府君赤丘岡人也來
居于婺源城南四十里之大田傳三葉至庚三府君生士
安士剛士剛生伯漢伯漢生宗獻世安之先府君也今其
近屬蓋二千餘指莫不詳著焉以為此近而親者也若曰
自春秋邾武子封其子于倪以國為氏俊去邑為倪漢御
史大夫寬是也其後又為倪唐汴州刺史若水梁州刺史
潭字秋清兵部檢校尚書封魏國公諱康民字時思郎徽

之休寧赤丘岡之所從出者士剛之從兄弟士毅府君譜
之詳矣世安謹而畧之以爲是皆遠而疏者也是所以爲
信而有徵也是所以別親疏序恩義明源流而示其後之
人也歟

銘曰 倪在春秋諸侯世胄漢有大儒唐有循吏徽之
發源善述善繼道學師傳政治德器有燁其光
綿綿奕世

南昌劉氏族譜序

南昌劉君允佩洪武甲戌進士今仕爲懷慶知府以家譜
授予爲之序允佩予鄉安成之故家也乃祖樂溪先生諱
觀行字大素與其兄觀國字大初皆博學儒者而尤邃於
醫大初以至正庚寅徙居南昌逮壬辰之亂至乙未而極

樂溪亦將家避兵南昌城中遂家于東湖之南一子從周
克大其業允佩之尊君也樂溪生七月大父太史公筮仕
判安福先公在侍有同年之會六十年於此矣樂溪之沒
以洪武庚申予不及得而見之也今幸與允佩相識而且
以譜序爲托予豈能忘情哉安成劉氏出於晉太守遐奉
母魏氏夫人家于官所有三子曰賦曰賒曰賄生禮禮生
三子曰承貺承崇承美承貺之後拆居上村上成太和承
崇之後居于永新之中村後隆吉水之夏璜富溪永豐之
白茅而後隆有相承楚國公冲之爲允顯承美之後居于
下村元豐中雲龍先生弁爲允顯承貺之後亦競爽代不
乏人允佩之所從出者也雲龍楚國之盛吾知其將有待
按譜承貺生謙謙生錦錦生嗣嗣生立節立節生徑徑生

照煦生若深若深生邦臣邦臣生時升時升生禮禮生洪
極字建甫與先祖俱爲宋宗婚時稱郡馬郡馬生炎意炎
意生務本始得劉河間之術名譽弁然樂溪先生之父也
此允之先十餘年世之所積累也族有異姓者出之無嗣
者續之昭穆失序者正之子孫不許爲僧道喪祭不許從
異端婚娶不論財賄宗族不論貧富有事必告于宗子守
名節不得爲人奴隸保丘隴不得傷其薪木凡此又皆其
家法之存於譜者猶可考見也嗚呼此譜者何可一日無
也然考此譜自晉至今千有餘歲承貺之後蓋數世乃至
譙譙必承貺之子承崇之後數世乃至景洪景洪亦非承
崇之子也景洪本名宏譜避諱作洪實楚國公之大夫也
楚國少時從學於予家而遠祖妣又楚國之孫女炎熹之
娶於左氏也亦予族祖之媼姪故以他書考之而知其必
有誤者允佩尚信予而正之也至遐自從遠而從王者非
是系出彭城楚元王之後與長沙定王發不相干者允佩
之所自考據得之矣

盱江湖氏族譜序

盱江湖君子昂出其家譜一編求爲之序按譜胡氏始于
金陵五代末有曰公霸仕宋累贈廬陵郡開國侯家值夏
遂爲廬陵祖曰杞徙居南豐後遷于南城則爲今隄湖祖
由公霸迄今十九世中間詩禮簪纓之傳歷歷可考其尤
著者宋通議大夫資政殿學士忠簡公邦行上高宗封事
乞斬秦檜大理評事剛簡夢昱在理宗朝言濟邸事忤史
彌遠二公剛風毅氣貫徹金石名昭史冊落落與星日爭

光至今讀之凜有生氣是爲胡氏之顯祖稽古自十一世
監察御史延禎山西僉憲子孫以來尚皆脩飭禮義砥礪
名節不愧負于前聞人是譜重編於延禎子淳完於其子
原鵬從子原牧其書則承事郎福州府知連江縣事原昂
遡昂而上世次歷官有詳有畧自昂而下則其名某行某
字某官某處娶某氏葬某處地又特著之詳焉系其族雖
貧且賤不棄匪族雖富貴在所不錄嗟乎明矣哉胡氏之
譜也不強其所難知不畧其親且近昭昭穆穆秩然有序
而無冒昧欺妄之愆俾爲子孫者知祖宗之一原則夫相
親相愛相勉勵以相周恤孝弟之心油然而生不至於途
人之譏者庶在茲歟子昂好學善仕宦其於忠公剛簡之
事業知之素矣予特嘉胡氏之多賢也故又表而出之是

爲序

新塗吳氏族譜序

新塗吳君節性以洪武丁卯與予舉同進士于鄉今爲國
子助教清慎恬退予敬君之有德也余嘗過君所居玉笥
鄉何君石下玉笥山之秀色郁然蒼翠而巨石有六離立
平地洞穴奇峭草樹葱鬱泉流鏘然過者爲徘徊而不能
去吳君之祖正道當宋末避唐小龍之亂自永豐來歸至
君九世矣予嘗謂家世之盛與地之靈秀相符也君辱以
宗譜示予云其先出於延陵季子至漢大司馬大將軍廣
平侯漢十二傳至元英始居于閩之邵武又二十六世至
諱邠者九子通九流之術周流四方而子虞始居永豐之
層山七世至某尤邃於醫通天文地理訪子虞之族至于

永豐有劉縣判者名家也愛某之才德以其子妻焉卜居于縣西北隅仕宋爲醫學博士輕車都尉子杏林先生繼爲大醫院正是爲正道之父正道以來避亂何君因葬焉何君吳氏之先墓蓋自此始正道生世昌世昌生才卿才卿生明甫明甫生希漢希漢生禮禮生貴倫貴倫生仲信吳君之父也醫術自某七世至希漢而後大顯希漢父子之陰德在人不少矣至今其族人多通其術益知吳氏儒術之施未崇顯而醫道於人者亦方殷而未艾也且節性今爲太學官遇

聖天子親視學侍座聽講宴錫便蕃此千載一時之遇而吳君方且勤勤勉勉以教育英才爲已任比於他官其功效亦未可一二計者其與處醫而爲者仁之及物事無不而大過之天之報之將又必有大於今日者而此譜將不一書者他譜多喜借名位爲張大以華其宗以耀人耳目此譜獨斷斷焉無假辭無一妄語誠可信而有徵者是又得於天之一也彼之雜以人爲者烏足道哉

新塗丁氏族譜序

丁氏出於齊侯呂伋後漢丁某以功封新安侯子孫散居越中至唐咸通中其諱珍者有官湖外因家焉後分上中下三院時謂甲族四世至思錡兄弟九人其季思覲少負不羈盡節於馬氏史書稱之思覲之子雋字京賢孝友雍睦一門長幼百餘人同爨而食不畜私財大中祥符四年鄉之耆老數百人列狀于朝詔加旌表爲樹名木震耀湖湘化及雞犬子孫進士及第者相望而醴陵丁氏遂有

聞於天下此見於翰林學士其所爲記也後有諱昌者知
臨江之新喻縣有惠政因家焉昌三子長曰暹居新喻縣
中次曰遜居丁村少曰遂居月橋下灞八世泰卿諱震徙
居之新淦赦原諸子南忠南獨南服南金南名南式皆名
進士而赦原丁氏復大顯於宋至元盛時有諱諤諤治者
父子嘗聯科第族人無不習詩禮江鄉之未能或先也永
樂四年南忠之九世孫彥珍以泰寧學官奉 詔來脩書
禁中出其譜請予爲之序予惟赦原之顯以文學新喻之
顯以惠政醴陵之顯以孝義各以其盛者言之而三者常
相有而不可相無也新安之功名則在於天下者可思仰
而不可求望者也

永新田南劉氏重脩族譜序

予占水劉氏族屬蓋多有之率皆蕃衍而派別甚嚴不以
毫髮混淆也若同江之劉出於翟斜在宋公非兄弟顯名
時稱臨江三劉其先則歐陽文忠公所謂共父墓銘詳
矣然亦言自其祖父始大獨南嶺劉氏謂出於翟斜而上
泝長沙定三爲始祖不知其何以云也今永新田南劉氏
元末之亂失其宗譜至南循南周兄弟六人念其自同江
來居田南纔十世名諱字行大畧皆可記憶而未筆之於
書恐其久而或昧也其叙曰始來自同江者曰慶甫生德
中德中生勉仲勉仲三子曰清鄉深鄉濟鄉清鄉生武良
從兄弟凡六人武良生漢叟再從兄弟凡十二人漢叟生
煥甫煥甫生仲鼎仲鼎生時敬南循南周之父也世積長
厚隱約間里但知其出於同江之上世若翟斜若長沙定

王未嘗遠引以爲華冒予甚喜其不與夸詡者類也若南
嶺本與同江源委一致在元文敏也生重脩譜牒則所書
嚴甚可疑者皆闕之於是其所以分合皆不可知予所謂
不以混淆者如此而尚患其遠引長沙也夫譜貴傳信將
來而已若田南此作初無浮泛之辭者信夫吉水之譜牒
家法有所自来也歟

吉水花園王氏重脩族譜序

三松王先生之八代孫德基奉其族譜請予爲之序予讀
郡志知元祐進士端禮名節又讀三松文集想見其風流
思見其子孫而與之論議也而德基適以譜牒來按其源
流本撫州臨川柳樹下王氏荆國公之第十宣教始來居
于吉水之白沙今驛亭其故居也三世至端禮字茂甫歸

休築別墅于西塘有花竹池館之勝故人又以花園王氏
稱之其仲子南賓字鴻舉領鄉薦楊文節公爲之行狀見
於集中可謂善繼其父者也其子舜輔字大臨號醉軒文
節爲之銘其墓其第二子才臣字子俊是爲三松先生所
謂世濟其美者也三松之墓在白沙予嘗往過之徘徊有
吊古之感况今得覩世系之詳居第之遺流風遺韻尚可
想見何其幸哉矧予家自唐至德初家于南山視所居密
邇將乞身于朝亦歸休于此庶幾端禮之事尤相類也德
基宗族甚盛子孫昌大未可涯涘尚相與頡頏與保其家
聲是予之所望也

